


CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

4

SEP 28 1956

T742/8229
(v.4)



春秋穀梁傳

宣公

元年春王正月公即位

繼故而言即位與聞乎故也

解見桓元年

公子遂如齊逆女

三月遂以夫人婦姜至自齊

其不言氏喪未畢故略之也其曰婦緣姑言之

之辭也遂之挈由上致之也

挈者謂去氏族而直書名上謂宣公

夏季孫行父如齊

哈佛大學哈佛燕京
圖書館珍藏印

晉放其大夫胥甲父于衛。

放猶屏也。稱國以放，放無罪也。屏除也。

公會齊侯于平州，公子遂如齊。

六月，齊人取濟西田。

內不言取，言取授之也。以是為賂齊也。宣公弒立。賂齊

以自輔。恥賂之。故書齊取。

秋，邾子來朝。

楚人、鄭人侵陳，遂侵宋。

遂繼事也。

晉趙盾帥師救陳。

善救陳也。

裴公作斐宋公、陳侯、衛侯、曹伯會晉師于裴林，伐鄭。

列數諸侯而會晉趙盾，大趙盾之事也。其曰師

何也，以其大之也。于裴林地而後伐鄭，疑辭也。

此其地何則著其美也。夫救災恤患，其道宜速。方云會于裴林，然後伐

鄭。狀似伐鄭有疑。須會乃定。曰非也。欲美趙盾之功。故詳錄其會地耳。

崇公作柳冬，晉趙穿帥師侵崇。

晉人、宋人伐鄭。

伐鄭所以救宋也

二年春王二月壬子宋華元帥師及鄭公子歸生帥師戰于大棘宋師敗績獲宋華元

獲者不與之辭也言盡其衆以救其將也以三

軍敵華元華元雖獲不病矣

華元得衆故不與鄭獲之

秦師伐晉

夏晉人宋人衛人陳人侵鄭

畢公作獯

秋九月乙丑晉趙盾弑其君夷臯

穿弑也盾不弑而曰盾弑何也以罪盾也其以

罪盾何也曰靈公朝諸大夫而暴彈之徒舟觀其辟

丸也趙盾入諫不聽出亡至於郊趙穿弑公而

後反趙盾史狐書賊曰趙盾弑公盾曰天乎天

乎予無罪孰爲盾而忍弑其君者乎史狐曰子

爲正卿入諫不聽出亡不遠君弑反不討賊則

志同志同則書重非子而誰故書之曰晉趙盾

弑其君夷臯者過在下也曰於盾也見忠臣之

至於許世子止見孝子之至

書重謂盾是正卿又賢也盾以亡不

出竟反不討賊受弑君之罪忠不至故也止以病不知嘗藥受弑父之罪孝不至故也

冬十月乙亥天王崩

三年春王正月郊牛之口傷

之口緩辭也傷自牛作也

改卜牛牛死乃不郊

事之變也乃者亡乎人之辭也譏公不恭致天變

猶三望

葬匡王

楚子伐陸渾戎

夏楚人侵鄭

陸公作賁
渾戶門反
又戶困反
左渾下有
之字

秋赤狄侵齊

宋師圍曹

冬十月丙戌鄭伯蘭卒

葬鄭穆公

四年春王正月公及齊侯平莒及邾莒人不肯

及者內為志焉爾平者成也不肯者可以肯也

公伐莒取向

伐猶可取向甚矣莒人辭不受治也伐莒義兵

也取向非也乘義而為利也乘義取邑莒人所以不服

秦伯稻卒。

夏六月乙酉，鄭公子歸生弑其君夷。

赤狄侵齊。

秋，公如齊，公至自齊。

冬，楚子伐鄭。

五年春，公如齊。

夏，公至自齊。

左無字字

秋九月，齊高固來逆子叔姬。

諸侯之嫁子於大夫，主大夫以與之，來者接內

也不正其接內，故不與夫婦之稱也。

解見莊二十七年。

叔孫得臣卒。

冬，齊高固及子叔姬來。

及者，及吾子叔姬也。為使來者，不使得歸之意。

也。叔姬歸寧。當以獨來為文。高固奉命。宜云來聘。經總之言來。故書及。為非禮。

楚人伐鄭。

六年春，晉趙盾、衛孫免侵陳。

此帥師也。其不言帥師何也？不正其敗前事故

不與帥師也。

元年救而
今更侵之

夏四月。

秋八月螽。

冬十月。

七年春衛侯使孫良夫來盟。

來盟前定也。不言及者以國與之。不言其人亦以國與之。不日前定之盟不日。

夏公會齊侯伐萊。

秋公至自伐萊。

大旱。

冬公會晉侯宋公衛侯鄭伯曹伯于黑壤。

八年春公至自會。

夏六月公子遂如齊至黃乃復。

乃者亡乎人之辭也。復者事畢也。不專公命也。

大夫受命而出。雖死以尸將事。今遂以疾而還。失禮違命。故曰亡乎人。言魯使不得其人也。遂以疾反。而加事畢之文。者不使遂專命而還也。

辛巳有事于大廟仲遂卒于垂。

為若反命而後卒也。此公子也。其曰仲何也。疏之也。何為疏之也。是不卒者也不疏則無用見。

小卒是不宜書卒者也。

其不卒也。則其卒之何也。以譏乎宣也。其譏乎宣何也。聞大夫之喪。則去樂卒事。祭于大廟之日。而知仲遂卒。垂。齊地。先書復。後言卒。使若遂已反命于君。而後卒于垂也。是不卒。謂遂與宣公共弑子赤也。若書公子。則與正卒者同。故去公子以見之。其卒之何也者。據公子翬不書卒也。去樂卒事云者。言今不然。故譏之。

壬午。猶繹。萬入去籥。

猶者。可以已之辭也。繹者。祭之日。旦日之享賓也。萬。舞名。籥。管也。內舞去籥。惡其聲聞。此為卿變於常禮。是知其不可而為之也。

熊左作羸 戊子。夫人熊氏薨。

晉師白狄伐秦。

楚人滅舒鄆。

秋七月甲子。日有食之。既。

冬十月己丑。葬我小君頃熊。雨不克葬。

葬既有日。不為雨止。禮也。雨不克葬。喪不以制

也。喪不以制。舊解謂不當臨雨而制喪事。豈有執紼者五百人。觸雨而行哉。徐邈曰。喪事有

進無退。又士喪禮。有潦車載簞笠。則人君之張設。固兼備矣。葬為雨止。喪事不以禮制也。

庚寅。日中而克葬。

鄆音了本 又作蓼左 公作蓼

頃音傾左 作敬

而緩辭也。足乎日之辭也。定十五年。日下稷。乃克葬。彼云。乃。急辭也。是二文相對為緩急。公羊傳。曷為或言而。或言乃。乃難乎而也。

城平陽。

楚師伐陳。

九年春王正月公如齊公至自齊。

夏仲孫蔑如京師。

齊侯伐萊。

秋取根牟。

八月滕子卒。

九月晉侯宋公衛侯鄭伯曹伯會于扈。

晉荀林父帥師伐陳。

辛酉晉侯黑臀卒于扈。徒門。

其地於外也。其日未踰竟也。於外謂國都之外。

冬十月癸酉衛侯鄭卒。

宋人圍滕。

楚人伐鄭晉卻缺帥師救鄭。

陳殺其大夫泄冶。

稱國以殺其大夫殺無罪也。泄冶之無罪如何。

泄左作洩

陳靈公通于夏徵舒之家公孫寧儀行父亦通其家或衣其衣或衷其襦以相戲於朝泄冶聞之入諫曰使國人聞之則猶可使仁人聞之則不可君愧於泄冶不能用其言而殺之衷者襦在衷也十年春公如齊公至自齊齊人歸我濟西田公娶齊齊由以爲兄弟反之不言來公如齊受之也爾雅釋親曰婦之黨爲婚兄弟夏四月丙辰日有食之巳巳齊侯元卒

齊崔氏出奔衛

氏者舉族而出之之辭也

公如齊五月公至自齊

癸巳陳夏徵舒弑其君平國

六月宋師伐滕

公孫歸父如齊葬齊惠公

晉人宋人衛人曹人伐鄭

秋天王使王季子來聘

其曰王季王子也其曰子尊之也聘問也

于者貴稱

釋公作類

公孫歸父帥師伐邾取繹

大水

季孫行父如齊

冬公孫歸父如齊

齊侯使國佐來聘

饑

楚子伐鄭

十有一年春王正月

夏楚子陳侯鄭伯盟于夷陵

夷左公作辰

公孫歸父會齊人伐莒

秋晉侯會狄于欒纂函

不言及外狄

冬十月楚人殺陳夏徵舒

此入而殺也其不言入何也外徵舒於陳也其
外徵舒於陳何也明楚之討有罪也

丁亥楚子入陳

入者內弗受也日入惡入者也何用弗受也不

使夷狄為中國也

楚子納淫亂之人制其君臣
慎倒上下是以夷狄為中國

寧公作甯

納公孫寧儀行父于陳

納者內弗受也輔人之不能民而討猶可入人

之國制人之上下使不得其君臣之道不可人

與昏淫當絕而楚強納之是制人之上下

十有二年春葬陳靈公

楚子圍鄭

夏六月乙卯晉荀林父帥師及楚子戰于郟處晉師

敗績

績功也功事也日其事敗也

舊解此戰事書日者為敗之故也餘

邈云日當作日於此發傳者深閔中國大敗于強楚也。以日為語辭理足通矣。但舊解為日月之日。故皆存之。

秋七月

冬十有二月戊寅楚子滅蕭

晉人宋人衛人曹人同盟于清丘

宋師伐陳衛人救陳

公作伐衛

十有三年春齊師伐莒

夏楚子伐宋

秋螽

穀戶本反
一本作穀
二傳六作
穀

春秋左傳卷之...

冬。晉殺其大夫先穀。

十有四年。春。衛殺其大夫孔達。

夏。五月。壬申。曹伯壽卒。

晉侯伐鄭。

秋。九月。楚子圍宋。

葬曹文公。

冬。公孫歸父會齊侯于穀。

十有五年。春。公孫歸父會楚子于宋。

夏。五月。宋人及楚人平。

平者成也。善其量力而反義也。人者衆辭也。平

稱衆。上下欲之也。外平不道。以吾人之存焉。道

之也。量力而反義者。各自知力不能相制。反共和之義也。吾人謂歸父。

六月。癸卯。晉師滅赤狄潞氏。以潞子嬰兒歸。

滅國有三術。中國謹日。卑國月。夷狄不日。其日

潞子嬰兒賢也。術猶道也。襄六年傳。中國日。卑國月。夷狄時。此云不日者。方釋

書日之意。故不云夷狄時也。嬰兒復稱名者。書日以表其賢。書名以見滅國。善惡兩舉也。

秦人伐晉。

王札子殺召伯毛伯。

春秋左傳卷之... 宣公

王札子者當上之辭也殺召伯毛伯不言其何也兩下相殺也兩下相殺不志乎春秋此其志何也矯王命以殺之非忿怒相殺也故曰以王命殺也以王命殺則何志焉為天下主者天也繼天者君也君之所存者命也為人臣而侵其君之命而用之是不臣也為人君而失其命是不君也君不君臣不臣此天下所以傾也其解經不言殺其大夫也

秋螽

無公作年

仲孫蔑會齊高固于無婁

初稅畝

初者始也古者什一藉而不稅初稅畝非正也

古者三百步為里名曰井田井田者九百畝公

田居一私田稼不善則非吏公田稼不善則非

民初稅畝者非公之去公田而履畝十取一也

以公之與民為已悉矣古者公田為居井竈葱

韭盡取焉藉而不稅借民力治公田而不稅民之私也非責也吏田峻也吏急民使

不得營私田故非之非民民勤私也何休曰宣公無恩信於民民不肯盡力公田故公家履踐

去如字又起呂反

案行。擇其穀最好者。稅取之。故曰履畝。徐邈曰。除去公田之外。又稅私田之十一也。為居八家共居。

冬。螽生。劉歆云。此蚘蟬子。董仲舒云。蝗子。

螽非災也。其曰螽非稅畝之災也。非稅畝之非責也。

饑。

十有六年。春。王正月。晉人滅赤狄甲氏及留吁。

榭公作謝
災左作火

夏。成周宣榭災。

周災不志也。其曰宣榭何也。以樂器之所藏目

之也。移風易俗。莫善於樂。是故貴其器。

秋。邾伯姬來歸。

冬。大有年。

五穀大熟為大有年。

十有七年。春。王正月。庚子。許男錫我卒。

丁未。蔡侯申卒。

夏。葬許昭公。

葬蔡文公。

六月。癸卯。日有食之。

己未。公會晉侯。衛侯。曹伯。邾子。同盟于斷道。

斷徒短反
一音短

同者有同也同外楚也

秋公至自會

冬十有一月壬午公弟叔肸卒

其曰公弟叔肸賢之也其賢之何也宣弑而非

之也非之則胡為不去也曰兄弟也何去而之

與之財則曰我足矣織履而食九其終身不食宣公

之食君子以是為通恩也以取貴乎春秋宣公弑子

赤叔肸嘗非之何去而之無所至也論情可以明親親言義足以厲不軌矣故貴之

十有八年春晉侯衛世子臧伐齊

身一作日

公伐杞

夏四月

秋七月邾人戕在陵繒子于繒

戕猶殘也稅殺也

稅捶打也字又而曰戕之林云木杖也

甲戌楚子呂卒

夷狄不卒卒少進也卒而不日日少進也日而

不言正不正簡之也楚莊王也中國正則日不正則不日夷狄進之則日

不論正不正故云簡之

公孫歸父如晉

稅他活反又徒活反一音拙又音睿或从才非本或作樸呂左公作旅

冬十月壬戌公薨于路寢

正寢也

櫪戶貞反
左作笙

歸父還自晉至櫪遂奔齊

還者事未畢也自晉事畢也與人之子守其父

之殯捐殯而奔其父之使者是以奔父也至櫪

遂奔齊遂繼事也

成公與歸父之子共守宣公之殯父命未反而已逐之是

與親奔父無異矣奔猶逐也

皇明天啓元年春正月烏程閔齊伋遇五父裁注



春秋穀梁傳

成公

元年春王正月公即位

二月辛酉葬我君宣公

無冰

終時無冰則志此未終時而言無冰何也終無

冰矣加之寒之辭也

周二月夏之十二月也此月既是常寒之月於寒之

中又如加甚常年過此無冰終無復冰矣

三月作丘甲

作爲也。丘爲甲也。丘甲國之事也。丘作甲非正也。丘作甲之爲非正何也。古者立國家百官具農工皆有職以事上。古者有四民。有士民有商民有農民有工民。夫甲非人人之所能爲也。丘作甲非正也。周禮九夫爲井。四井爲邑。四邑爲丘。甲。鎧也。使一丘之民皆作甲也。夏臧孫許及晉侯盟于赤棘。

賈左作茅

秋王師敗績于貿戎。

不言戰莫之敢敵也。爲尊者諱敵不諱敗。爲親者諱敗不諱敵。尊尊親親之義也。然則孰敗之。

晉也。

諱敵使莫二也。不諱敗容有過否。諱敗惜其毀折也。不諱敵諸侯有列國。

冬十月。

季孫行父禿。晉郤克眇。衛孫良夫跛。曹公子手。

僂同時而聘於齊。齊使禿者御禿者。使眇者御

眇者。使跛者御跛者。使僂者御僂者。蕭同姪子

處臺上而笑之。聞於客。客不說而去。相與立胥

閭而語。移日不解。齊人有知之者曰。齊之患必

自此始矣。

御。迎也。蕭國也。同姓也。姪子。字也。其母更嫁齊惠公。生頃公。宣十二年。楚

人滅蕭。故隨其母在齊。胥閭。門名。

僂於矩反。又力主反。

姪大節反。又丈乙反。

解古買反。又音蟹。

二年春齊侯伐我北鄙

夏四月丙戌衛孫良夫帥師及齊師戰于新築衛師敗績

僞本又作喬

手左氏作首

六月癸酉季孫行父臧孫許叔孫僑如公孫嬰齊帥師會晉郤克衛孫良夫曹公子手及齊侯戰于鞏齊師敗績

其日或曰日其戰也或曰日其悉也曹無大夫其日公子何也以吾之四大夫在焉舉其貴者

也 悉謂魯大夫悉在戰也舉其貴言不欲令內衆大夫與外卑者共行戰

爰左公作袁

秋七月齊侯使國佐如師巴西及國佐盟于爰婁

鞏去國五百里爰婁去國五十里一戰縣地五百里焚雍門之茨侵車東至海君子聞之曰夫甚甚之辭焉齊有以取之也齊之有以取之何也敗衛師于新築侵我北鄙敖郤獻子齊有以取之也爰婁在師之外郤克曰反魯衛之侵地以紀侯之麤來以蕭同姪子之母為質使耕者皆東其畝然後與子盟國佐曰反魯衛之侵地以紀侯之麤來則諾以蕭同姪子之母為質則

麤魚輦反又音言又

是齊侯之母也。齊侯之母猶晉君之母也。晉君之母猶齊侯之母也。使耕者盡東其畝，則是終土齊也。不可請一戰，一戰不克，請再；再不克，請三；三不克，請四；四不克，請五；五不克，舉國而授。於是而與之盟。去國去齊國也。雍門齊城門。茨蓋也。侵車侵伐之車也。爰婁在師之外，言師已逼其國矣。甌玉甌東其畝，欲以利其戎車，侵伐易也。終土齊也者，謂利其戎車，侵伐易，則是

八月壬午，宋公鮑卒。

庚寅，衛侯速卒。

取汶陽田。

冬，楚師鄭師侵衛。

十有一月，公會楚公子嬰、齊于蜀。

楚無大夫，其曰公子何也？嬰齊亢也。

丙申，公及楚人、秦人、宋人、陳人、衛人、鄭人、齊人、曹

人、邾人、薛人、繒人盟于蜀。

楚其稱人何也？於是而後公得其所也。會與盟

同月，則地會不地盟；不同月，則地會地盟。此其

地會地盟何也？以公得其所申其事也。今之屈

向之驕也

于會書公子以顯其亢。于盟稱人以表服罪。申其事。謂地會地盟也。

三年春王正月公會晉侯宋公衛侯曹伯伐鄭

辛亥葬衛穆公

二月公至自伐鄭

甲子新宮災三日哭

新宮者禰宮也三日哭哀也其哀禮也迫近不

敢稱諡恭也其辭恭且哀以成公為無譏矣

乙亥葬宋文公

夏公如晉

鄭公子去疾帥師伐許

公至自晉

秋叔孫僑如帥師圍棘

大雩

晉郤克衛孫良夫伐牆咎如

冬十有一月晉侯使荀庚來聘衛侯使孫良夫來

聘

丙午及荀庚盟丁未及孫良夫盟

其日公也來聘而求盟不言及者以國與之也

牆左作牆
公作將咎
音羔

不言其人亦以國與之也不言求兩欲之也不
及謂凡書來盟者若宣七年衛孫良夫來盟是
也。以國與之謂舉國為主。故直書外來爾。此先
聘而後盟。故不言來盟。總言及
而不復著其人。亦是舉國之辭。

鄭伐許。

四年春宋公使華元來聘。

三月壬申鄭伯堅卒。

杞伯來朝。

夏四月甲寅臧孫許卒。

公如晉。

葬鄭襄公。

秋公至自晉。

冬城鄆。

鄭伯伐許。

五年春王正月杞叔姬來歸。

婦人之義嫁日歸反日來歸。

仲孫蔑如宋。

夏叔孫僑如會晉荀首于穀。

梁山崩。

首公作秀

伯尊左氏
作伯宗

不日何也。高者有崩道也。有崩道則何以書也。
曰梁山崩。壅遏河三日不流。晉君召伯尊而問
焉。伯尊來遇輦者。輦者不辟。使車右下而鞭之。
輦者曰：所以鞭我者，其取道遠矣。伯尊下車而
問焉。曰：子有聞乎？對曰：梁山崩，壅遏河三日不
流。伯尊曰：君為此召我也。為之奈何？輦者曰：天
有山，天崩之。天有河，天壅之。雖召伯尊，如之何。
伯尊由忠問焉。輦者曰：君親素縞，帥羣臣而哭
之，既而祠焉，斯流矣。伯尊至，君問之曰：梁山崩

壅遏河三日不流，為之奈何？伯尊曰：君親素縞，
帥羣臣而哭之，既而祠焉，斯流矣。孔子聞之曰：
伯尊其無績乎？攘善也。
不日何也者，據僖十四
年秋八月辛卯沙鹿崩
也。彼無崩道而崩，故謹而書日。所以鞭我者，其
取道遠，謂所用鞭我之間，行道則可遠矣。伯車
以其言有理，知非庸人，故下車問之。由忠問，用
忠誠之心問之也。山崩川塞，示哀窮，所以凶服。
績，功也。攘，盜也。取輦者之
言而行之，非已之功也。

秋大水

冬十有一月，巳酉，天王崩。

十有二月，巳丑，公會晉侯、齊侯、宋公、衛侯、鄭伯、曹

伯邾子杞伯同盟于蟲牢

六年春王正月公至自會

二月辛巳立武宮

立者不宜立也

取鄆

鄆國也

衛孫良夫帥師侵宋

夏六月邾子來朝

公孫嬰齊如晉

鄆音專又市轉反

壬申鄭伯費卒

秋仲孫蔑叔孫僑如帥師侵宋

楚公子嬰齊帥師伐鄭

冬季孫行父如晉

晉欒書帥師救鄭

七年春王正月鼯鼠食郊牛角改卜牛鼯鼠又食

其角乃免牛

不言日急辭也過有司也郊牛日展斛角而知

傷展道盡矣其所以備災之道不盡也改卜牛

救公作侵

斛从斗音求見尤韻與斛不同斛从斗也斛本作筋

能如字一
作耐音
急緩不敬
如無人也

麋鼠又食其角。又有繼之辭也。其緩辭也。曰亡
乎人矣。非人之所能也。所以免有司之過也。乃
免牛。乃者亡乎人之辭也。免牲者為之緇衣纁
裳。有司玄端奉送。至于南郊。免牛亦然。免牲不
曰不郊。免牛亦然。急辭者。辭中促急。不容日也。
斛。球球然角貌。有司展察牛
而即知傷。是展察之道盡。不能防災禦患。致使
牛傷。故不書日。以顯有司之過也。至復食。乃知
國無賢君。天災之爾。非有
司之過。故言其以赦之。

吳伐鄭談

夏五月。曹伯來朝。

不郊。猶三望。

秋。楚公子嬰齊帥師伐鄭。公會晉侯。齊侯。宋公。衛
侯。曹伯。莒子。邾子。杞伯。救鄭。八月。戊辰。同盟于馬

陵。公至自會。

吳入州來。

冬。大雩。

雩不月而時。非之也。冬無為雩也。

衛孫林父出奔晉。

八年。春。晉侯使韓穿來言汶陽之田。歸之于齊。

于齊緩辭也不使盡我也

若曰。為之請歸。不使晉制命于我。

晉欒書帥師侵蔡

公孫嬰齊如莒

宋公使華元來聘

夏宋公使公孫壽來納幣

晉殺其大夫趙同趙括

秋七月天子使召伯來錫公命

禮有受命無來錫命錫命非正也曰天子何也

曰見一稱也

天王天子。王者通稱。未有言天子者。今言天子。是更見一稱。

錫左作賜

冬十月癸卯杞叔姬卒

晉侯使士燮來聘

叔孫僑如會晉士燮齊人邾人伐郟

衛人來媵

媵淺事也不志此其志何也以伯姬之不得其所

不得其所。謂災死。江熙曰。宋其失德。傷伯姬賢而嫁不得其所。

九年春王正月杞伯來逆叔姬之喪以歸

傳曰夫無逆出妻之喪而為之也

言不合為而為之

公會晉侯齊侯宋公衛侯鄭伯曹伯莒子杞伯同

盟于蒲。公至自會。

二月，伯姬歸于宋。

夏季，孫行父如宋致女。

致者不致者也。婦人在家制於父，既嫁制於夫。

如宋致女，是以我盡之也。不正，故不與內稱也。

逆者微，故致女詳其事。賢伯姬也。致女，致勅戒之言於女也。

以我盡之者，已嫁而猶以父制盡之也。內稱，謂稱使

晉人來媵。

媵，淺事也。不志，此其志何也。以伯姬之不得其

所，故盡其事也。

秋七月丙子，齊侯無野卒。

晉人執鄭伯，晉欒書帥師伐鄭。

不言戰，以鄭伯也。為尊者諱恥，為賢者諱過。為

親者諱疾。欒書以鄭伯伐鄭，君臣無戰道，故不言戰。為尊者諱恥，王師敗績于貿戎

是也。為賢者諱過，為齊桓諱滅項是也。為親者諱疾，此不言戰是也。鄭，兄弟之國，故謂之親。君

臣交兵，病莫大焉，故為之諱。

冬十有一月，葬齊頃公。

楚公子嬰齊帥師伐莒，庚申，莒潰。

其日莒雖夷狄猶中國也大夫潰莒而之楚是以知其上為事也惡之故謹而日之也

上為事謂臣以叛君為事明君臣無道也潰例月甚之故日

楚人入鄆

秦人白狄伐晉

鄭人圍許

城中城

城中城者非外民也

中城者郭之內而宮之外也

十年春衛侯之弟黑背帥師侵鄭

強其文反

夏四月五卜郊不從乃不郊

夏四月不時也五卜強也乃者亡乎人之辭也

五月公會晉侯齊侯宋公衛侯曹伯伐鄭

齊人來媵

丙午晉侯孺卒

乃侯

秋七月公如晉

冬十月

十有一年春王三月公至自晉

晉侯使郤犇來聘己丑及郤犇盟

犇尺由反
公羊作州
後同

夏季孫行父如晉

秋叔孫僑如如齊

冬十月

十有二年春周公出奔晉

周有入無出其曰出上下一見之也言其上下

之道無以存也上雖失之下孰敢有之今上下

皆失之矣

上謂僖二十四年天王出居于鄭下謂今周公出奔上下皆一見之上雖

有不君之失臣下莫敢效不臣之過今復云周公之出則上下皆有失矣

瑣公作沙

夏公會晉侯衛侯于瑣澤

秋晉人敗狄于交剛

中國與夷狄不言戰皆曰敗之夷狄不曰

冬十月

十有三年春晉侯使郤錡魚綺來乞師

乞重辭也古之人重師故以乞言之也

三月公如京師

公如京師不月月非如也非如而曰如不叛京

師也

時實會晉伐秦因其過朝故正其文若使本自往

夏五月公自京師遂會晉侯宋公衛侯鄭伯曹伯

邾人、滕人伐秦。

言受命不敢叛周也。使若王命已伐秦也。叛周謂專征伐。

曹伯廬卒于師。

傳曰：閔之也。公大夫在師曰師，在會曰會。

秋七月，公至自伐蔡。

冬葬曹宣公。

葬時正也。

十有四年，春王正月，莒子朱卒。

夏，衛孫林父自晉歸于衛。

秋，叔孫僑如如齊逆女。

鄭公子喜帥師伐許。

九月，僑如以夫人婦姜氏至自齊。

大夫不以夫人以夫人非正也。刺不親迎也。僑

如之挈由上致之也。

冬十月，庚寅，衛侯臧卒。

秦伯卒。

十有五年，春王正月，葬衛定公。

三月乙巳，仲嬰齊卒。

廬力吳反，又力魚反，左作盧。

事提也，提僑如之名，由成公不親迎而使大夫議不在僑如。

此公孫也。其曰仲何也？子由父疏之也。

此蓋仲遂之子。

父有弑君之罪。故不得言公子。父不言公子。則子不得稱公孫。是見疏之罪由父故。

成公羊作戊

癸丑公會晉侯、衛侯、鄭伯、曹伯、宋世子成、齊國佐、

歸于下公羊有之字

邾人同盟于戚。晉侯執曹伯歸于京師。

以執侯而斥執曹伯。惡晉侯也。不言之。急辭也。

斷在晉侯也。

以侯執伯。執之。不以其罪也。斷在晉侯。明晉之私也。

公至自會。

夏六月宋公固卒。

楚子伐鄭。

秋八月庚辰葬宋共公。

月卒日葬。非葬者也。此其言葬何也？以其葬共

姬不可不葬。共公也。葬共姬則其不可不葬。共

公何也？夫人之義不踰君也。為賢者崇也。

共公正立。

卒當書月。葬無甚危。則當錄月。今反常違例。故知不葬者也。然則共公之不宜書葬。昏亂故。

宋華元出奔晉。宋華元自晉歸于宋。

宋殺其大夫山。

宋魚石出奔楚。

冬十有一月。叔孫僑如會晉士燮、齊高無咎、宋華

其

元衛孫林父鄭公子鱗秋邾人會吳于鍾離

會又會外之也

再書會者殊外夷狄

許遷于葉

遷者猶得其國家以往者也其地許復見也

十有六年春王正月雨木冰

雨而木冰也志異也傳曰根枝折

雨而木冰雨著木成冰也

夏四月辛未滕子卒

鄭公孫喜帥師侵宋

六月丙寅朔日有食之

晉侯使欒黶來乞師

甲午晦晉侯及楚子鄭伯戰于鄢陵楚子鄭師敗

績

日事遇晦日晦四體偏斷日敗此其敗則日也

楚不言師君重於師也

楚殺其大夫公子側

秋公會晉侯齊侯衛侯宋華元邾人于沙隨不見

公

不見公者可以見公也可以見公而不見公譏

在諸侯也

公至自會

公會尹子晉侯齊國佐邾人伐鄭

曹伯歸自京師

不言所歸歸之善者也出入不名以為不失其

國也歸為善自某歸次之

歸為善謂直言歸而不言其國此曹伯歸

自京師不言于曹是也自某歸若蔡季自陳歸于蔡

意作招

九月晉人執季孫行父舍之于茗丘

執者不捨而舍公所也執者致而不致公在也

何其執而辭也猶存公也存意公亦存也公存

也公所也者以公在茗丘故也公在茗丘而言

舍者明不得致也若既不致復不言舍則無

以見其舍矣公在在茗丘也見舍于茗丘還國

則與公俱不得致者重在公也何其執而辭也

問何故書執季孫行父而言舍之復不致之為

辭邪猶存公也者時行父雖為晉所執猶欲存

公之所在故不致行父又言舍之皆所以見公

在茗丘也存意公亦存也者問存舍之不致之

意便可知公所在乎公存也答上問

冬十月乙亥叔孫僑如出奔齊
十有二月乙丑季孫行父及晉郤犢盟于扈
公至自會

乙酉刺公子偃

大夫日卒正也先刺後名殺無罪也

十有七年春衛北宮括帥師侵鄭

括公羊作結

夏公會尹子單子晉侯齊侯宋公衛侯曹伯邾人伐鄭

六月乙亥同盟于柯陵

柯陵之盟謀復伐鄭也

秋公至自會

不曰至自伐鄭也公不周乎伐鄭也何以知公

之不周乎伐鄭以其以會致也何以知其盟復

伐鄭也以其後會之人盡盟者也不周乎伐鄭

則何為日也言公之不背柯陵之盟也

周信也公逼諸

侯為此盟爾意不欲更伐鄭也後會謂冬公會單子也何為日也據無伐鄭意而強盟盟不由忠不當日也不背謂舍已從人遂伐鄭也

齊高無咎出奔莒

九月辛卯用郊

夏之始可以承春以秋之末承春之始蓋不可矣九月用郊用者不宜用也宮室不設不可以

祭衣服不修。不可以祭。車馬器械不備。不可以祭。有司一人不備其職。不可以祭。祭者薦其時也。薦其敬也。薦其美也。非享味也。郊春事也。四月不時。今言可者。方明秋末之不可。故以是為猶可也。一事闕。猶不可祭。何得九月用郊乎。

晉侯使荀營來乞師。

冬公會單子。晉侯。宋公。衛侯。曹伯。齊人。邾人。伐鄭。

言公不背柯陵之盟也。

十有一月。公至。自伐鄭。

壬申。公孫嬰齊卒于狸蜃。

履左作服
公作軫

十一月無壬申。壬申乃十月也。致公而後錄臣

子之義也。其地未踰竟也。

嬰齊實以十月壬申卒。而公以十一月還。

先致公而後錄其卒。故壬申在十一月下。

十有二月。丁巳。朔。日有食之。

邾子貜且卒。

晉殺其大夫卻錡。卻犢。卻至。

自禍於是起矣。厲公見殺之禍。

楚人滅舒庸。

十有八年。春。王正月。晉殺其大夫胥童。

庚申。晉弑其君州蒲。稱國以弑其君。君惡甚矣。

齊殺其大夫國佐。

公如晉。

夏。楚子鄭伯伐宋。宋魚石復入于彭城。

公至自晉。

晉侯使士匄來聘。

秋。杞伯來朝。

八月。邾子來朝。

築鹿囿。

築不志。此其志何也。山林藪澤之利。所以與民共也。虞之非正也。

己丑。公薨于路寢。

路寢。正也。男子不絕婦人之手。以齊終也。

冬。楚人鄭人侵宋。

晉侯使士魴來乞師。

十有二月。仲孫蔑會晉侯宋公衛侯邾子齊崔杼

同盟于虛朶。

齊如字又側皆反

魴音房公作彭

丁未葬我君成公。

皇明天啓元年春正月烏程閔齊伋遇五父裁注

春秋穀梁傳

襄公

元年春王正月公即位

繼正即位正也

仲孫蔑會晉欒黶宋華元衛甯殖曹人莒人邾人

滕人薛人圍宋彭城

繫彭城於宋者不與魚石正也

成公作屈

夏晉韓厥帥師伐鄭

鄆公作合

仲孫蔑會齊崔杼曹人邾人杞人次于鄆似稜

秋楚公子壬夫帥師侵宋

九月辛酉天王崩

邾子來朝

冬衛侯使公孫剽孫來聘

晉侯使荀罃來聘

二年春王正月葬簡王

鄭師伐宋

夏五月庚寅夫人姜氏薨

六月庚辰鄭伯古踰卒

晉師宋師衛甯殖侵鄭

其曰衛甯殖如是而稱于前事也

初衛侯速卒鄭人侵之故

舉甯殖之報明稱于前事也不書晉宋之將以慢其伐人之喪

秋七月仲孫蔑會晉荀罃宋華元衛孫林父曹人

邾人于戚

己丑葬我小君齊姜

叔孫豹如宋

冬仲孫蔑會晉荀罃齊崔杼宋華元衛孫林父曹

人邾人滕人薛人小邾人于戚遂城虎牢

齊如字謚也一音側皆反後齊歸同

若言中國焉內鄭也

不繫虎牢于鄭者。如中國之邑也。中國猶國中。所以

如國中之邑者。鄭服罪。故內之。

楚殺其大夫公子申。

三年春。楚公子嬰齊帥師伐吳。

公如晉。

夏四月壬戌。公及晉侯盟于長檮。公至自晉。

六月。公會單子。晉侯。宋公。衛侯。鄭伯。莒子。邾子。齊

世子光。已未。同盟于雞澤。

同者有同也。同外楚也。

陳侯使袁僑如會。

如會外乎會也。於會受命也。

解見僖二十八年。

戊寅。叔孫豹及諸侯之大夫及陳袁僑盟。

及以及與之也。諸侯以為可與則與之。不可與

則釋之。諸侯盟。又大夫相與私盟。是大夫張也。

故雞澤之會。諸侯始失正矣。大夫執國權曰袁

僑。異之也。

通言叔孫豹及諸侯之大夫。則無以表袁僑之得禮。故再言及。明獨與袁

僑不與諸侯之大夫。異之。異袁僑之得禮也。

秋。公至自晉。

冬晉荀罃帥師伐許

四年春王三月巳酉陳侯午卒

夏叔孫豹如晉

秋七月戊子夫人妣氏薨

葬陳成公

八月辛亥葬我小君定姒

冬公如晉

陳人圍頓

五年春公至自晉

如公作弋下同

夏鄭伯使公子發來聘

叔孫豹繪世子巫如晉

外不言如而言如為我事往也

外相如不書為魯事往故同內

稻左作道

仲孫蔑衛孫林父會吳于善稻

吳謂善伊謂稻緩號從中國名從主人

善稻吳謂之伊

緩地名及物類當從中國言之故不言伊緩而言善稻人名當從本俗言也

秋大雩

楚殺其大夫公子壬夫

公會晉侯宋公陳侯衛侯鄭伯曹伯莒子邾子滕

左無莒子至薛伯八字

子薛伯齊世子光吳人。縉人于戚。公至自會。
冬。戍陳。

內辭也。不言諸侯。魯戍之。疏曰。諸侯同戍也。以救陳具列諸侯。故於此獨言魯戍。

楚公子貞帥師伐陳。公會晉侯宋公衛侯鄭伯曹伯莒子邾子滕子薛伯齊世子光救陳。十有二月。公至自救陳。

善救陳也。

辛未。季孫行父卒。

六年。春。王三月。壬午。杞伯姑容卒。

夏。宋華弱來奔。

秋。葬杞桓公。

滕子來朝。

莒人滅縉。

非滅也。中國日卑。國月夷。狄時縉中國也。而時非滅也。家有既亡。國有既滅。滅而不自知。由別之而不別也。莒人滅縉。非滅也。立異姓以蒞祭

祀。滅亡之道也。

縉前夫人。莒女。生世子巫。巫之母與魯襄公之母姊妹也。縉更娶後夫人于莒。而無子。有女。還嫁于莒。為夫人。生公子。但縉子愛後之夫人。故立其外孫。莒之

公子。非其族類。神不歆其祀。故言滅。非滅。非以兵滅也。既盡也。家立異姓為後則亡。國立異姓為嗣。則滅。

冬。叔孫豹如邾。

季孫宿如晉。

十有二月。齊侯滅萊。

七年。春。邾子來朝。

夏四月。三卜。郊不從。乃免牲。

夏四月。不時也。三卜。禮也。乃者。亡乎人之辭也。

小邾子來朝。

城費。

秋。季孫宿如衛。

八月。螽。

冬。十月。衛侯使孫林父來聘。壬戌。及孫林父盟。

楚公子貞帥師圍陳。

十有二月。公會晉侯。宋公。陳侯。衛侯。曹伯。莒子。邾

子。于鄆。鄭伯。髡原。如會。未見諸侯。丙戌。卒于操。

未見諸侯。其曰如會何也。致其志也。禮諸侯不

生名。此其生名何也。卒之名也。卒之名。則何為

鄆于委反又
丸吹反一作
偽或作隄原
左作頑操七
報反又七南
反左作鄆

加之如會之上見以如會卒也其見以如會卒何也鄭伯將會中國其臣欲從楚不勝其臣弒而死其不言弒何也不使夷狄之民加乎中國之君也其地於外也其日未踰竟也日卒時葬正也臣欲從楚是夷狄之民矣不使夷狄臣弒中國君故去弒言卒使若正卒然

陳侯逃歸

以其去諸侯故逃之也

八年春王正月公如晉

夏葬鄭僖公

鄭人侵蔡獲蔡公子濕

人微者也浸淺事也而獲公子公子病矣

季孫宿會晉侯鄭伯齊人宋人衛人邾人于邢丘

見魯之失正也公在而大夫會也公在在晉也

公至自晉

莒人伐我東鄙

秋九月大雩

冬楚公子貞帥師伐鄭

晉侯使士匄來聘

濕本又作濕又音變左公作變二十年同

災公作火 九年春宋災

外災不志此其志何也故宋也

故猶先也孔子之先宋人

夏季孫宿如晉

五月辛酉夫人姜氏薨

秋八月癸未葬我小君穆姜

冬公會晉侯宋公衛侯曹伯莒子邾子滕子薛伯

小邾子齊世子光伐鄭十有二月巳亥同盟于戲

不異言鄭善得鄭也不致恥不能據鄭也

同盟于戲

鄭在可知矣戲盟還而楚伐鄭故恥不能終有

楚子伐鄭

十年春公會晉侯宋公衛侯曹伯莒子邾子滕子

薛伯杞伯小邾子齊世子光會吳于相

會又會外之也

夏五月甲午遂滅傅陽

遂直遂也其曰遂何不以中國從夷狄也

時實吳會

諸侯滅傅陽恥以中國之君從夷狄之主故加甲午使若改日諸侯自滅傅陽耳

公至自會

會夷狄不致惡事不致此其致何也存中國也

傳左公作

中國有善事則并焉。無善事則異之。存之也。汲
鄭伯逃歸。陳侯致祖之會。存中國也。滅中國。自諸侯之一
青爾。從夷狄而滅人。則中國不復存矣。故書公至以存之。有善則并。如僖四年侵蔡。蔡潰。遂伐楚。是并焉也。異之。謂此會與遂。若異人也。汲。猶引也。鄭伯髡原為臣所弑。而不書弑。此引而致於善事也。

楚公子貞。鄭公孫輒帥師伐宋。

晉師伐秦。

秋。莒人伐我東鄙。

公會晉侯。宋公。衛侯。曹伯。莒子。邾子。齊世子光。滕

子。薛伯。杞伯。小邾子。伐鄭。

斐左作駢

冬。盜殺鄭公子斐。公子發。公孫輒。

稱盜以殺大夫。弗以上下道。惡上也。

以上下道。當言鄭人

殺其大夫。惡上者。惡鄭伯不能修政刑。致盜殺大夫也。

戍鄭虎牢。

其曰鄭虎牢。決鄭乎虎牢也。

繫之於鄭。決絕而棄外之。

楚公子貞帥師救鄭。

公至自伐鄭。

十有一年。春。王正月。作三軍。

春秋左傳卷之九

襄公

作為也古者天子六師諸侯一軍作三軍非正也

大國三軍。次國二軍。小國一軍。魯有二軍。今增置中軍爾。

夏四月四卜郊不從乃不郊

夏四月不時也四卜非禮也

鄭公孫舍之帥師侵宋

公會晉侯宋公衛侯曹伯齊世子光莒子邾子滕

子薛伯杞伯小邾子伐鄭

京左作毫

秋七月己未同盟于京城北公至自伐鄭

不以後致盟後復伐鄭也

盟後重更伐鄭故以伐致

楚子鄭伯伐宋

公會晉侯宋公衛侯曹伯齊世子光莒子邾子滕

子薛伯杞伯小邾子伐鄭會于蕭魚公至自會

伐而後會不以伐鄭致得鄭伯之辭也

喜鄭與會故

楚人執鄭行人良霄

行人者挈國之辭也

挈猶傳也。行人傳國使會命。故云挈國之辭。

冬秦人伐晉

十有二年春王三月莒人伐我東鄙圍郟

伐國不言圍邑舉重也取邑不書圍安足書也

郟他來反又音臺本或作台左公作台

舉重可以包輕也。不足書而今書。蓋為下事起

季孫宿帥師救郕。遂入鄆。

遂繼事也。受命而救郕。不受命而入鄆。惡季孫宿也。

夏。晉侯使士魴來聘。

秋。九月。吳子乘卒。

冬。楚公子貞帥師侵宋。

公如晉。

十有三年。春。公至自晉。

郕音詩公作詩

夏取郕

秋九月庚辰楚子審卒

冬城防

十有四年春王正月季孫宿叔老會晉士匄齊人

宋人衛人鄭公孫薑曹人莒人邾人滕人薛人杞

人小邾人會吳于向

二月乙未朔日有食之

夏四月叔孫豹會晉荀偃齊人宋人衛北宮括鄭

公孫薑曹人莒人邾人滕人薛人杞人小邾人伐

豐丑邁反公作蠻

秦

公侯下有衍字

己未衛侯出奔齊

莒人侵我東鄙

秋楚公子貞帥師伐吳

冬季孫宿會晉士匄宋華閱衛孫林父鄭公孫薑

莒人邾人于戚

十有五年春宋公使向戌來聘二月己亥及向戌

盟于劉

劉夏逆王后于齊

過我故志之也

夏齊侯伐我北鄙圍成公救成至遇

季孫宿叔孫豹帥師城成郛

秋八月丁巳日有食之

邾人伐我南鄙

冬十有一月癸亥晉侯周卒

十有六年春王正月葬晉悼公

三月公會晉侯宋公衛侯鄭伯曹伯莒子邾子薛

伯杞伯小邾子于溴梁戊寅大夫盟

溴古闕反讀若跌

澠梁之會諸侯失正矣諸侯會而曰大夫盟正
在大夫也諸侯在而不曰諸侯之大夫大夫不
臣也

晉人執莒子邾子以歸

齊侯伐我北鄙

夏公至自會

五月甲子地震

叔老會鄭伯晉荀偃衛甯殖宋人伐許

秋齊侯伐我北鄙圍成

成左作郕

大雩

冬叔孫豹如晉

十有七年春王二月庚午邾子矰卒

宋人伐陳

夏衛石買帥師伐曹

秋齊侯伐我北鄙圍桃齊高厚帥師伐我北鄙圍
防

九月大雩

宋華臣出奔陳

矰音闕又
下奸反左
作輕

桃公作洮
左高上作
齊字

冬邾人伐我南鄙。

十有八年春白狄來。

夏晉人執衛行人石買。

稱行人怨接於上也。

怨其君而執其使。稱行人。明使人爾。罪在上也。

侯二傳作師

秋齊侯伐我北鄙。

冬十月公會晉侯宋公衛侯鄭伯曹伯莒子邾子

滕子薛伯杞伯小邾子同圍齊。

非圍而曰圍齊有大焉亦有病焉非大而足同

焉諸侯同罪之也亦病矣。

知非圍者據實伐也。不以圍致故也。齊有

大焉亦有病焉謂經稱同圍之意齊雖有似大國焉亦有罪惡焉病所罪惡也謂數伐魯又復國大故稱同圍之耳非大而足同覆上齊有大焉諸侯同罪之意也謂齊若非大國何須諸侯同罪之也亦病矣謂齊是大國諸侯共同罪之必為大國所讎是取禍之道故云亦罪惡矣言諸侯與齊同有罪惡也

曹伯負芻卒于師。

閔之也。

楚公子午帥師伐鄭。

十有九年春王正月諸侯盟于祝柯晉人執邾子

公至自伐齊。

柯公作阿

春秋之義已伐而盟復伐者則以伐致盟不復

伐者則以會致祝柯之盟盟復伐齊與曰非也

然則何為以伐致也曰與人同事或執其君或

取其地盟復伐齊與者。恠不以會致也。同與邾

圍齊。而晉執其君。魯取其地。此與盟後

復伐無異。故以伐齊致也。事實在此。不

關於齊。而以伐齊致者。託事以見意耳。

取邾田自濼水

軋辭也其不日惡盟也

軋委曲隨濼水言取之多也惡盟謂執若取地

濼火號反又音郭

軋於八反

季孫宿如晉

葬曹成公

夏衛孫林父帥師伐齊

環公作環

秋七月辛卯齊侯環卒

晉士匄帥師侵齊至穀聞齊侯卒乃還旋

還者事未畢之辭也受命而誅生死無所加其

怒不伐喪善之也善之則何為未畢也君不尸

小事臣不專大名善則稱君過則稱已則民作

讓矣士匄外專君命故非之也然則為士匄者

宜奈何宜墀帷而歸命乎介還者致辭復者反命言乃還不言乃

春秋設梁專襄公

八月丙辰仲孫蔑卒

齊殺其大夫高厚

鄭殺其大夫公子嘉

冬葬齊靈公

城西郛

叔孫豹會晉士匄于柯

城武城

二十年春王正月辛亥仲孫速會莒人盟于向

夏六月庚申公會晉侯齊侯宋公衛侯鄭伯曹伯

莒子邾子滕子薛伯杞伯小邾子盟于廬淵市然

秋公至自會

仲孫速帥師伐邾

蔡殺其大夫公子濕蔡公子履出奔楚

陳侯之弟光出奔楚

諸侯之尊弟兄不得以屬通其弟云者親之也

親而奔之惡也

顯書弟明其親也親而奔逐之所以惡陳侯

叔老如齊

冬十月丙辰朔日有食之

濕二傳作夢先左作黃

季孫宿如宋。

二十有一年春王正月公如晉。

邾庶其以漆閭丘來奔。

以者不以者也來奔者不言出舉其接我者也

漆閭丘不言及小大敵也

不以者人臣無專
祿以邑叛之道

夏公至自晉。

秋晉欒盈出奔楚。

九月庚戌朔日有食之。

冬十月庚辰朔日有食之。

曹伯來朝。

公會晉侯齊侯宋公衛侯鄭伯曹伯莒子邾子于

商任。

庚子孔子生。

二十有二年春王正月公至自會。

夏四月。

秋七月辛酉叔老卒。

冬公會晉侯齊侯宋公衛侯鄭伯曹伯莒子邾子

滕子薛伯杞伯小邾子于沙隨公至自會。

五無滕子
二字

楚殺其大夫公子追舒。

二十有三年春王二月癸酉朔日有食之。

三月己巳杞伯旬卒。

昇公作真夏邾昇我來奔。

葬杞孝公。

陳殺其大夫慶虎及慶寅。

稱國以殺罪累上也及慶寅慶寅累也

陳侯之弟光自楚歸于陳。

晉欒盈復入于晉入于曲沃。

秋齊侯伐衛遂伐晉。

渝左作榆

八月叔孫豹帥師救晉次于雍渝。

言救後次非救也。

惡其不遂君命而專止次故先通君命而後言次

己卯仲孫速卒。

冬十月乙亥臧孫紇出奔邾。

其日正臧孫紇之出也蘧伯玉曰不以道事其

君者其出乎。

正正其有罪也其出乎言必不見容

晉人殺欒盈。

惡之弗有也。

不言殺其大夫是不有之以為大夫

塗鳥路反
又同都反
廷徒佞反
又如字

不塗弛侯。廷道不除。百官布而不制。鬼神禱而

不祀。此大侵之禮也。升成也。嘽不足貌。康虛也。侵傷也。弛廢也。侯射侯也。

廷道不除。廷內道不修除也。布而不制。官職修列。不可闕廢。不更有造作也。

二十有五年。春。齊崔杼帥師伐我北鄙。

夏五月乙亥。齊崔杼弑其君光。

莊公失言淫于崔氏。

失言將淫崔氏。爲此見弑。

公會晉侯。宋公。衛侯。鄭伯。曹伯。莒子。邾子。滕子。薛

伯。杞伯。小邾子。于夷儀。

六月壬子。鄭公孫舍之。帥師入陳。

秋八月己巳。諸侯同盟于重丘。公至自會。

衛侯入于夷儀。

楚屈建帥師滅舒鳩。

冬。鄭公孫夏帥師伐陳。

十有二月。吳子謁伐楚。門于巢。卒。

以伐楚之事。門于巢。卒也。于巢者。外乎楚也。門

于巢。乃伐楚也。諸侯不生名。取卒之名。加之伐

楚之上者。見以伐楚卒也。其見以伐楚卒何也。

古者大國過小邑。小邑必飾城而請罪。禮也。吳

子謁伐楚。至巢，入其門。門人射吳子，有矢創及舍而卒。古者雖有文事，必有武備。非巢之不飾城而請罪，非吳子之自輕也。非責也

二十有六年，春，王二月，辛卯，衛甯喜弑其君剽。

此不正，其日何也？殖也。立之，喜也。君之正也。

剽知

不正者，以元年稱公孫故也。父立以為君，則子宜君之矣。

衛孫林父入于戚以叛。

甲午，衛侯衎復歸于衛。

日歸，見知弑也。

衎苦旦反一本作衎

夏，晉侯使荀吳來聘。

公會晉人、鄭良霄、宋人、曹人于澶淵。

秋，宋公殺其世子痤。

晉人執衛甯喜。

八月，壬午，許男甯卒于楚。

冬，楚子、蔡侯、陳侯伐鄭。

葬許靈公。

二十有七年，春，齊侯使慶封來聘。

夏，叔孫豹會晉趙武、楚屈建、蔡公孫歸生、衛石惡。

座在禾反左公作痤

與公作環

陳孔魚煥鄭良霄許人曹人于宋

衛殺其大夫甯喜

稱國以殺罪累上也甯喜弑君其以累上之辭

言之何也嘗為大夫與之涉公事矣甯喜由君

弑君而不以弑君之罪罪之者惡獻公也以喜弑君

而殺則不宜既入以為大夫為大夫而復殺之明以他故矣獻公即衍也書喜弑其君則喜之

罪不嫌不明今若不言喜之無罪而死則獻之惡不彰也

衛侯之弟專出奔晉

專喜之徒也專之為喜之徒何也已紀雖急納其

專左公作

兄與人之臣謀弑其君是亦弑君者也專其曰

弟何也專有是信者君賂不入乎喜而殺喜是

君不直乎喜也故出奔晉其織絢邯鄲終身不言

衛專之去合乎春秋獻公本使專與喜為約納君許以寵賂今反殺之獻

公使專失信故稱弟見獻之惡也絢者著履舄之頭

秋七月辛巳豹及諸侯之大夫盟于宋

澠梁之會諸侯在而不曰諸侯之大夫大夫不

臣也晉趙武恥之豹云者恭也諸侯不在而曰

諸侯之大夫大夫臣也其臣恭也晉趙武為之

會也。豹云。謂不舉姓氏。趙武恥湟梁之會。大夫不臣。合帥諸侯大夫爲恭。故歸功趙武。

冬十有二月乙亥朔日有食之。

二十有八年春無冰。

夏衛石惡出奔晉。

邾子來朝。

秋八月大雩。

仲孫羯如晉。

冬齊慶封來奔。

十有一月公如楚。

十有二月甲寅天王崩。

乙未楚子昭卒。

二十有九年春王正月公在楚。

閔公也。

公爲楚所制。故存錄。

夏五月公至自楚。

喜之也。致君者。殆其往而喜其反。此致君之意。

義也。

殆。危也。

庚申衛侯衎卒。

閔弒吳子餘祭。

寺本又作
侍

怨如字又
於元反

儀公作齊
左無邾人
二字

闔門者也。寺人也不稱名。姓闔不得齊於人。不稱其君。闔不得君其君也。禮君不使無恥。不近刑人。不狎敵。不邇怨。賤人非所貴也。貴人非所刑也。刑人非所近也。舉至賤而加之。吳子。吳子近刑人也。闔弑吳子餘祭。仇之也。怨仇餘祭。故弑之。仲孫羯會晉荀盈。齊高止。宋華定。衛世叔儀。鄭公孫段。曹人。莒人。邾人。滕人。薛人。小邾人。城杞。古者天子封諸侯。其地足以容其民。其民足以滿城。以自守也。杞危而不能自守。故諸侯之大

夫相帥以城之。此變之正也。

諸侯恤災救危。正也。諸侯微弱。政由

大夫。大夫能同恤災危。故曰變之正。

晉侯使士鞅來聘。

杞子來盟。

吳子使札來聘。

吳其稱子何也。善使延陵季子。故進之也。身賢賢也。使賢亦賢也。延陵季子之賢。尊君也。其名

成尊於上也。

春秋賢者不名。而札名者。唯成吳之尊稱也。直稱吳。則不得有大夫

矣。成尊。謂進吳稱子。上君上也。

秋七月葬衛獻公

齊高止出奔北燕

其曰北燕從史文也

南燕姑姓在鄭衛之間北燕姬姓在晉之北時有直

言燕者故仲尼從史文也

冬仲孫羯如晉

三十年春王正月楚子使于委遠罷來聘

夏四月蔡世子般班弑其君固

其不日子奪父政是謂夷之

夷狄君卒皆不日比之夷狄也

五月甲午宋災伯姬卒

左伯姬上又有宋字

罷晉皮公作頗

建音代又大計反

佞公作年

取卒之日加之災上者見以災卒也其見以災卒奈何伯姬之舍失火左右曰夫人少辟火乎伯姬曰婦人之義傅母不在宵不下堂遂逮乎火而死婦人以貞為行者也伯姬之婦道盡矣詳其事賢伯姬也

天王殺其弟佞夫

傅曰諸侯且不首惡況於天子乎君無忍親之義天子諸侯所親者唯長子母弟耳天王殺其

弟佞夫甚之也

王子瑕奔晉

二傳葬下
又有宋字

秋七月叔弓如宋葬共姬

外夫人不書葬此其言葬何也吾女也卒災故
隱而葬之也

鄭良霄出奔許自許入于鄭鄭人殺良霄

不言大夫惡之也

冬十月葬蔡景公

不日卒而月葬不葬者也卒而葬之不忍使父

失民於子也

夫葬者臣子之事也景公無子不可謂無民若不書葬則嫌亦失民

故曰不忍使父失民於子

晉人齊人宋人衛人鄭人曹人莒人邾人滕人薛
人杞人小邾人會于澶淵宋災故

會不言其所為其曰宋災故何也不言災故則

無以見其善也其曰人何也救災以衆何救焉

更宋之所喪財也澶淵之會中國不侵伐夷狄

夷狄不入中國無侵伐八年善之也晉趙武楚

屈建之力也

更償也

三十有一年春王正月

夏六月辛巳公薨于楚宮

楚宮非正也

秋九月癸巳子野卒

子卒日正也

巳亥仲孫羯卒

冬十月滕子來會葬

癸酉葬我君襄公

十有一月莒人弒其君密州

烏程閔齊伋
遇五父裁注



春秋穀梁傳

昭公

元年春王正月公即位

繼正即位正也

叔孫豹會晉趙武楚公子圍齊國弱宋向戌衛齊

惡陳公子招上昭蔡公孫歸生鄭罕虎許人曹人于郭

三月取鄆

夏秦伯之弟鍼其釐出奔晉

諸侯之尊弟兄不得以屬通其弟云者親之也

弱公作酌
惡公作
惡罕公
軒郭左
號公作

親而奔之惡也

六月丁巳邾子華卒

國公作原

晉荀吳帥師敗狄于大原

傳曰中國曰大原夷狄曰大鹵號從中國名從

主人解見襄五年

左展下有與字

秋莒去疾自齊入于莒莒展出奔吳

叔弓帥師疆鄆圃

疆之為言猶寬也

葬邾悼公

冬十有一月巳酉楚子卷卒

楚公子比出奔晉

二年春晉侯使韓起來聘

夏叔弓如晉

秋鄭殺其大夫公孫黑

冬公如晉至河乃復

恥如晉故著有疾也

公凡四如晉季氏訴公於晉侯使不見公故託至河有疾而反以殺恥二十三年曰至河有疾乃復是微有疾而反嫌與四如晉同故明之

季孫宿如晉

卷音權左作縻二傳亦有作縻者

公如晉而不得入季孫宿如晉而得入惡季孫宿也

原公作泉

三年春王正月丁未滕子原卒

夏叔弓如滕五月葬滕成公

秋小邾子來朝

八月大雩

冬大雨雹

北燕伯款出奔晉

其曰北燕從史文也

雪或為雹
左作雹

四年春王正月大雨雪

夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申楚人執徐子秋七月楚子蔡侯陳侯許男頓子胡子沈子淮夷伐吳執齊慶封殺之

此入而殺其不言入何也慶封封乎吳鍾離其不言伐鍾離何也不與吳封也慶封其以齊氏何也為齊討也靈王使人以慶封令於軍中曰有若齊慶封弑其君者乎慶封曰子一息我亦

且一言曰有若楚公子圍弑其兄之子而代之以爲君者乎。軍人粲然皆笑。慶封弑其君而不以弑君之罪罪之者。慶封不爲靈王服也。不與楚討也。春秋之義。用貴治賤。用賢治不肖。不以亂治亂也。孔子曰。懷惡而討。雖死不服。其斯之謂與。云慶封封乎。吳鍾離者。言時殺慶封。自于鍾離。實不入吳也。粲然。盛笑貌。傳例稱人以殺大夫。爲殺有罪。今殺慶封。經不稱人。故曰不以弑君之罪罪之也。

屬左作賴

遂滅厲

遂繼事也

九月取緡

冬十有二月乙卯叔孫豹卒

五年春王正月舍中軍

貴復正也

魯次國。舊二軍。襄十一年立三軍。今毀之。故曰復正。

楚殺其大夫屈申

公如晉

夏莒牟夷以牟婁及防茲來奔

以者不以者也。來奔者不言出。及防茲。以大及小也。莒無大夫。其曰牟夷何也。以其地來也。以

地來則何以書也。重地也。竊地之罪重。故不得不錄其人。

秋七月公至自晉。

戊辰叔弓帥師敗莒師于賁泉。

狄人謂賁泉失台號從中國名從主人。

秦伯卒。

冬楚子蔡侯陳侯許男頓子沈子徐人越人伐吳。

六年春王正月杞伯益姑卒。

葬秦景公。

夏季孫宿如晉。

葬杞文公。

宋華合比出奔衛。

秋九月大雩。

楚薳罷帥師伐吳。

冬叔弓如楚。

齊侯伐北燕。

七年春王正月暨齊平。

平者成也暨猶暨暨也暨者不得已也以外及

內曰暨。

賁扶粉反
左作盼公
作墳

三月公如楚

叔孫婁如齊蒞盟

婁丑畧反
公作舍後
皆同

蒞位也。內之前定之辭。謂之蒞。外之前定之辭。謂之來。

夏四月甲辰朔日有食之

秋八月戊辰衛侯惡卒

鄉曰衛齊惡。今日衛侯惡。此何為君臣同名也。君子不奪人名。不奪人親之所名。重其所以來也。王父名子也。
鄉曰。在元年。父受命名于王父。王父卒。則聽王父之命名之。

九月公至自楚

冬十有一月癸未季孫宿卒

十有二月癸亥葬衛襄公

八年春陳侯之弟招殺陳世子偃師

鄉曰陳公子招。今日陳侯之弟招何也。曰盡其親所以惡招也。兩下相殺。不志乎春秋。此其志何也。世子云者。唯君之貳也。云可以重之存焉。志之也。諸侯之尊。兄弟不得以屬通。其弟云者。親之也。親而殺之。惡也。
鄉曰。在元年。盡其親。謂既稱公子。又稱弟。招。先

君之公子。今君之
母弟矣。惡惡招也。

夏四月辛丑陳侯溺卒

叔弓如晉

楚人執陳行人于徵師殺之

稱人以執大夫執有罪也稱行人怨接於上也

陳公子留出奔鄭

秋蒐于紅

正也。因蒐狩以習用武事禮之大者也。艾蘭以

為防置旃以為轅門以葛覆質以為檠流旁握

擊古帝反
挂也劉兆
云經也本
或作擊
揜一作揜

御擊者不得入車軌塵馬候蹄揜禽旅御者不

失其馳然後射者能中過防弗逐不從奔之道

也面傷不獻不成禽不獻禽雖多天子取三十

焉其餘與士眾以習射於射宮射而中田不得

禽則得禽田得禽而射不中則不得禽是以知

古之貴仁義而賤勇力也

比年大蒐失禮因此
以見正故曰正蘭香
草防為田之大限也通帛曰旃轅門中臬恐木棋傷馬
轅表門也質樞也檠也藥門中臬恐木棋傷馬
足故以葛草覆之流至也流旁握謂兩車韉頭
各去門邊空握握四寸也擊挂則不得入門以
恥其御拙也車軌塵塵不出轍也馬候蹄發足
相應遲疾相投也揜禽旅揜取眾禽也不從奔

之道戰不逐奔之義也。不成禽不獻。惡虐幼小也。射宮澤宮。射以不爭為仁。揖讓為義。

陳人殺其大夫公子過。

大雩。

冬十月壬午。楚師滅陳。執陳公子招。放之于越。殺

陳孔魚。

惡楚子也。

惡其滅人之國。故有罪。殺無辜。故實是楚子。而言師。

葬陳哀公。

不與楚滅閔公也。

滅國不葬。閔陳之滅。故書葬以存之。

九年春。叔弓會楚子于陳。

許遷于夷。

火左作災

夏四月。陳火。

國曰災。邑曰火。火不志。此何以志。閔陳而存之

也。

秋。仲孫矍如齊。

冬。築郎囿。

十年春。王正月。

齊公作晉

夏。齊欒施來奔。

意公作隱 後同

秋。七月。季孫意如。叔弓。仲孫矍帥師伐莒。

戊子。晉侯彪卒。

九月。叔孫婍如晉。葬晉平公。

成公作戊

十有二月。甲子。宋公成卒。

二公作正

十有一年。春。王二月。叔弓如宋。葬宋平公。

虔或作乾

夏四月。丁巳。楚子虔誘蔡侯般。殺之于申。

何為名之也。夷狄之君誘中國之君而殺之。故

謹而名之也。稱時稱月。稱日稱地。謹之也。

楚公子棄疾帥師圍蔡。

五月。甲申。夫人歸氏薨。

大蒐于比蒲。

仲孫貜會邾子盟于禘祥。

禘子鳩反
又七林反
禘祥公作
浸羊

秋季。孫意如會晉韓起。齊國弱。宋華亥。衛北宮佗。

鄭罕虎。曹人杞人。于厥慙。

慙魚斬反
又五轄反
厥慙公作
屈銀

九月。己亥。葬我小君齊歸。

冬。十有一月。丁酉。楚師滅蔡。執蔡世子友。以歸。用

之。

此子也。其曰世子何也。不與楚殺也。一事註乎

志。所以惡楚子也。

此子也者。諸侯在喪稱子也。一事註乎志。一事輒註而志。

之也。變子言世子。使若不得其君然。

十有二年春齊高偃帥師納北燕伯于陽。

納者內不受也。燕伯之不名何也。不以高偃摯。

燕伯也。

不名何也者。據義不可受則應名而絕之也。公子遂以去公子為摯。燕伯以書

名為摯者。臣宜書名。故須去公子乃為摯。君不可名。而以臣名君者。不但去燕伯則為摯也。是以目燕伯而不書名。所以不與高偃摯之。

三月壬申鄭伯嘉卒。

夏宋公使華定來聘。

公如晉至河乃復。

季孫氏不使遂乎晉也。

五月葬鄭簡公。

虎左作熊公作然

楚殺其大夫成虎。

秋七月。

愁公作整

冬十月公子愁出奔齊。

楚子伐徐。

晉伐鮮虞。

其曰晉狄之也。其狄之何也。不正其與夷狄交。

伐中國故狄稱之也。

鮮虞姬姓白狄。故曰中國。夷狄交代謂楚伐徐。

十有三年春叔弓帥師圍費

溪二傳作谿

夏四月楚公子比自晉歸于楚弑其君虔于乾溪

自晉晉有奉焉爾歸而弑不言歸言歸非弑也

歸一事也弑一事也而遂言之以比之歸弑比

不弑也弑君者日不日比不弑也

傳例曰歸為善然則弑君

不得言歸比不弑之一驗也歸弑其事各異自

宜別書而今連言之是比之歸遇君弑爾比不

殺公作弑

楚公子棄疾殺公子比

當上之辭也當上之辭者謂不稱人以殺乃以

君殺之也討賊以當上之辭殺非弑也比之不

弑有四取國者稱國以弑楚公子棄疾殺公子

比比不嫌也春秋不以嫌伐嫌棄疾主其事故

嫌也

當上之辭者謂不稱人以殺而云公子棄疾殺公子比如王札子殺召伯毛伯也稱

人以殺謂若衛人殺祝吁于濮是也今比實不

弑故以君殺大夫之辭言之使比實有弑君之

罪則人人皆欲殺宜稱人以殺之今言楚公子

棄疾殺公子比明棄疾所殺非弑君之人比之

不弑四驗也取國者稱國以弑謂若比欲取國

而弑君者當直云楚比弑其君虔不應言公子

疾之意。亦以比欲為君之嫌而殺之。是棄疾以比為嫌。棄疾弑比而自立。亦是嫌也。今棄疾不以國氏者。不以嫌代嫌。故也。若以嫌代嫌。當云楚棄疾殺公子比矣。但由不以嫌代嫌。故存棄疾之氏耳。棄疾主其事故嫌也者。棄疾殺比。理實有嫌。但為不以嫌代嫌。故經無其事。傳以棄疾經無嫌文。故云棄疾主其事。故嫌也。主其事者。主殺比之事也。

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘。八月甲戌同盟于平丘。公不與盟。

同者有同也。同外楚也。公不與盟者。可以與而不與。譏在公也。其曰善是盟也。公以數如晉不得入。故不肯與。

盟。善是盟者。善其會盟。因楚有難。而反陳蔡之君也。

晉人執季孫意如以歸。公至自會。

蔡侯廬歸于蔡。陳侯吳歸于陳。

善其成之會而歸之。故謹而日之。此未嘗有國

也。使如失國辭然者。不與楚滅也。

八年。楚滅陳。十一年。楚滅

蔡。諸侯因楚之難。會平丘而反陳蔡之君。故於其歸。追述前盟謹日之意。以美諸侯。非謹陳蔡歸國之是也。於盟。則發謹日之美。於歸。則論致美之義。

冬十月葬蔡靈公。

變之不葬有三。失德不葬。弑君不葬。滅國不葬。

然且葬之。不與楚滅。且成諸侯之事也。

春秋之常。小國

夷狄不葬。變之。謂改常禮。失德。無君道也。弑君。謂不討賊。如無臣子也。滅國。無臣子也。靈公弑。逆無道。身死國滅。而書葬者。不令夷狄加乎中國。且成諸侯興滅繼絕之善也。

公如晉。至河乃復。

吳滅州來。

十有四年。春意如至自晉。

大夫執則致。致則名。意如惡然而致。見君臣之

禮也。

大夫有罪。則宜廢之。既不

三月。曹伯滕卒。

夏四月。

秋葬曹武公。

八月。莒子去疾卒。

冬。莒殺其公子意恢。

言公子而不言大夫。莒無大夫也。莒無大夫而

曰公子意恢。意恢賢也。曹莒皆無大夫。其所以

無大夫者。其義異也。

曹叔振鐸。文王之子。武王

封之于曹。在甸服之內。後

十有五年。春。王正月。吳子夷末卒。

未公至作

春秋左傳卷八

二月癸酉有事于武宮。籥入。叔弓卒。去樂卒事。

君在祭樂之中。聞大夫之喪。則去樂卒事。禮也。

君在祭樂之中。大夫有變。以聞可乎。大夫國體

也。古之人重死。君命無所不通。君在祭樂之中。君在廟中祭作

樂也。君之卿佐。是謂股肱。故曰國體。君命無所不通。解命告也。

公作昭吳無出字

夏蔡朝吳出奔鄭。

六月丁巳朔日有食之。

秋晉荀吳帥師伐鮮虞。

冬公如晉。

十有六年春齊侯伐徐。

晏公作曼楚子誘戎蠻子殺之。

夏公至自晉。

秋八月乙亥晉侯夷卒。

九月大雩。

季孫意如如晉。

冬十月葬晉昭公。

十有七年春小邾子來朝。

夏六月甲戌朔日有食之。

秋郟子來朝

八月晉荀吳帥師滅陸渾戎

冬有星孛于大辰

一有一亡曰有于大辰者濫于大辰也大辰者大火也

不曰孛于大火而曰大辰者謂濫于蒼龍之體不獨加大火

楚人及吳戰于長岸

兩夷狄曰敗中國與夷狄亦曰敗楚人及吳戰

于長岸進楚子故曰戰夷狄不能結日成陳故曰敗

十有八年春王三月曹伯須卒

夏五月壬午宋衛陳鄭災

其志以同日也其日亦以同日也或曰人有謂

鄭子產曰某日有災子產曰天者神子惡知之

是人也同日為四國災也

六月邾人入郟

秋葬曹平公

冬許遷于白羽

十有九年春宋公伐邾

夏五月戊辰許世子止弑其君買

陸公作賁左作陸渾之戎字蒲內反本又作蒂音佩

郟音禹又音矩

春秋左傳卷之...

歡昌悅反
又當悅反
軒之然反
又居言反

日弑正卒也。正卒則止不弑也。不弑而日弑責止也。止曰我與夫弑者不立乎其位以與其弟。虺哭泣歔飭粥嗑不容粒未踰年而死。故君子即止自責而責之也。就其有自責心。故以備禮責之。

巳卯地震。

秋齊高發帥師伐莒。

冬葬許悼公。

日卒時葬不使止為弑父也。日子既生不免乎水火母之罪也。羈貫成童不就師傅父之罪也。

就師學問無方心志不通身之罪也。心志既通而名譽不聞友之罪也。名譽既聞有司不舉有司之罪也。有司舉之王者不用王者之過也。許世子不知嘗藥累及許君也。羈貫謂交午剪髮以為飾。成童八歲以上也。許君不授子以師傅。使不識嘗藥之義。故累及之。

二十年春王正月。

夏曹公孫會自夢出奔宋。

自夢者專乎夢也。曹無大夫其曰公孫何也。言其以貴取之而不以叛也。專乎夢能專制夢也。會以公孫之貴而得

夢無工反
又亡忠反
又亡弄反
本或作蔑
左作鄭

夢。既而不以之叛。明曹君無道。致令其奔。非會之罪。故書公孫以善之。

輒左作繫 秋盜殺衛侯之兄輒

盜賤也。其曰兄母兄也。目衛侯。衛侯累也。然則

何為不為君也。曰有天疾者。不得入乎宗廟。輒

者何也。曰兩足不能相過。齊謂之綦。楚謂之跣。

衛謂之輒。諸侯之尊。兄弟不得以屬通。經不書

能保護其兄。乃為盜所殺。故稱至賤。殺至貴耳。

何為不為君。據嫡兄宜為君也。綦連并也。跣聚

合不解也。冬十月。宋華亥向寧華定出奔陳。

綦音其又其與反跣女輒反輒本六作繫

寧公作寧

盧左作盧 十有一月辛卯蔡侯廬卒

二十有一年春王三月葬蔡平公

夏晉侯使士鞅來聘

宋華亥向寧華定自陳入于宋南里以叛

自陳陳有奉焉爾入者內弗受也其曰宋南里

宋之南鄙也以者不以者也叛直叛也直叛言不作亂

秋七月壬午朔日有食之

八月乙亥叔輒卒

冬蔡侯東出奔楚

叛公作畔後同

輒公作瘞

東左公作朱

東者東國也。何為謂之東也。王父誘而殺焉。父執而用焉。奔而又奔之曰東。惡之而貶之也。蔡侯

般。東國之王父。世子友。東國之父也。奔既罪矣。又奔讎國。惡莫大焉。

公如晉。至河乃復。

二十有二年。春。齊侯伐莒。

宋華亥向寧華定自宋南里出奔楚。

自宋南里者。專也。專。專制。南里也。

大蒐于昌間。

秋而曰蒐。此春也。其曰蒐何也。以蒐事也。

問如字一音簡公作姦

夏四月乙丑。天王崩。

六月。叔鞅如京師。葬景王。

王室亂。

亂之為言事未有所成也。

劉子單子以王猛居于皇。

以者不以者也。王猛嫌也。直言王猛不言王子。是有當國之嫌。

秋。劉子單子以王猛入于王城。

以者不以者也。入者內弗受也。猛非正也。

冬。十月。王子猛卒。

此不卒者也。其日卒，失嫌也。不卒，謂未成君也。其卒則失嫌，故錄之。

其卒則失嫌，故錄之。

十有二月癸酉朔，日有食之。

二十有三年春，王正月，叔孫婁如晉。

癸丑，叔鞅卒。

晉人執我行人叔孫婁。

晉人圍郊。

夏六月，蔡侯東國卒于楚。

秋七月，莒子庚輿來奔。

戊辰，吳敗頓、胡、沈、蔡、陳、許之師于雞甫。胡子髡、沈

子盈滅，獲陳夏齧。

中國不言敗，此其言敗何也？中國不敗，胡子髡

沈子盈，其滅乎？其言敗，釋其滅也。獲陳夏齧，獲

者，非與之辭也。上下之稱也。中國不言敗，據戰

楚敗晉師也。其言敗，釋其滅也。若師不敗，則君無由滅也。賢胡沈之君死社稷，非與之辭。不

與吳獲也。賢夏齧雖獲不病，以其得衆也。義與宣元年華元同。上下之稱者，君死曰滅，臣得曰

獲。君臣之稱。

天王居于狄泉。

甫左公作父盈左作逞公作極

始王也。其曰天王，因其居而王之也。天子踰年即位稱王。敬王踰年而出，故曰始王。雖不在國行即位之禮。王者以天下為家，故居于狄泉，稱王也。尹氏立王子朝。

立者不宜立者也。朝之不名何也？別嫌乎尹氏

之朝也。朝不直名而言王子者，若但言尹氏立朝，嫌朝是尹氏之子，故言王子以別之。

八月乙未地震。

左無下公字

冬，公如晉，至河，公有疾，乃復。疾不志，此其志何也？釋不得入乎晉也。

二十有四年，春，王二月丙戌，仲孫纘卒。

媯上公有叔孫二字

媯至自晉。

大夫執則致，致則挈由上致之也。上謂宗廟也。致，臣于廟，則

直名而已。所謂君前臣名。

夏五月乙未朔，日有食之。

秋八月大雩。

丁酉，杞伯郁釐卒。

冬，吳滅巢。

葬杞平公。

二十有五年，春，叔孫婁如宋。

郁公作鬱

倪左作詰
大公作世

鸛其俱反
本作鸛音
權公作鸛

乙二傳作
已陽公作
揚

夏。叔倪會晉趙鞅、宋樂大心、衛北宮喜、鄭游吉、曹人、邾人、滕人、薛人、小邾人于黃父。有鸛欲來巢。

一有一亡曰有。來者來中國也。鸛鵒穴者而曰

巢或曰增之也。增之也者如增言巢爾其實不巢也

秋七月上辛大雩。季辛又雩。

季者有中之辭也。又有繼之辭也。

九月乙亥公孫于齊。次于陽州。

孫之為言猶孫也。諱奔也。次止也。

齊侯唁公于野井。

弔失國曰唁。唁公不得入於魯也。

冬十月戊辰叔孫婁卒。

十有一月己亥宋公佐卒于曲棘。

邠公也。邠當為訪。謀也。言宋公所以卒于曲棘者欲謀納公也

十有二月齊侯取鄆。

取易辭也。內不言取以其為公取之故。易言之也。

二十有六年春王正月葬宋元公。

二月公至自齊居于鄆

公次于陽州其日至自齊何也以齊侯之見公

可以言至自齊也居于鄆者公在外也至自齊

道義不外公也以親見齊侯為重故可言至自齊也若但言至自齊而不言居于鄆則公得歸國矣欲明公實在外故言居于鄆也至自齊者臣子喜君父得反致宗廟之辭爾君雖在外猶以在國之禮存錄之是崇君之道也

夏公圍成非國不言圍所以言圍者以大公也

秋公會齊侯莒子邾子杞伯盟于鄆陵公至自會

居于鄆

公在外也至自會道義不外公也

九月庚申楚子居卒

冬十月天王入于成周

周有入無出也始即位非其所今得還復據宗廟是內故可言入若即位在廟則王者無外不言出

尹氏召伯毛伯以王子朝奔楚非責也奔篡君之賊其責遠矣謂不但責尹氏三人

遠矣非也奔直奔也蓋遠責諸侯附楚不誅子朝而使之奔讎諸侯之罪大矣故曰奔直奔也謂諸侯緩追逸賊任

春秋設忍專昭公

其奔而無所忌憚也。楚子朝之舅。於周爲讎。

二十有七年。春。公如齊。公至自齊。居于鄆。

公在外也。

夏四月。吳弑其君僚。

楚殺其大夫郟宛。

秋。晉士鞅。宋樂祁犁。衛北宮喜。曹人。邾人。滕人。會

于扈。

冬十月。曹伯午卒。

邾快來奔。

郟去逆反左公作郟宛於阮反又於元反

公如齊。公至自齊。居于鄆。

二十有八年。春。王三月。葬曹悼公。

公如晉。次于乾侯。

公在外也。

夏四月。丙戌。鄭伯寧卒。

六月。葬鄭定公。

秋七月。癸巳。滕子寧卒。

冬。葬滕悼公。

二十有九年。春。公至自乾侯。居于鄆。

寧公作寧下滕子寧同

齊侯使高張來唁公。

唁公不得入於魯也。

公如晉，次于乾侯。

夏四月庚子，叔倪卒。

季孫意如曰：叔倪無病而死，此皆無公也。是天

命也，非我罪也。

言倪欲納公，無病而死，此皆天命。使魯無君，公之出，非我罪。

秋七月。

冬十月，鄆潰。

潰之為言，上下不相得也。上下不相得，則惡矣。

亦譏公也。昭公出奔，民如釋重負。

三十年春王正月，公在乾侯。

中國不存，公存，公故也。

中國猶國中，謂魯也。昭以二十五年出奔，二十

六年居鄆，是魯地，不存公。至此寄在乾侯，為晉地。明公去魯竟而入於晉界，不復望還，遂卒于外。傳以有故釋之，所以閔公也。

夏六月庚辰，晉侯去疾卒。

秋八月，葬晉頃公。

冬十有二月，吳滅徐。徐子章羽奔楚。

三十有一年春王正月，公在乾侯。

羽二傳作禹

春秋左傳卷之二十四 昭公

標音歷舊
作蹠左作
蹠適丁歷
反

季孫意如會晉荀欒于適歷

夏四月丁巳薛伯穀卒

晉侯使荀欒唁公于乾侯

唁公不得入於魯也曰既為君言之矣不可者

意如也

言已已告魯求辨君唯意如不肯耳

秋葬薛獻公

冬黑肱以濫來奔

其不言邾黑肱何也別乎邾也其不言濫子何

也非天子所封也來奔內不言叛也

邾以濫邑別封黑肱

肱公作弓
濫力甘反
又如字

十有二月辛亥朔日有食之

三十有二年春王正月公在乾侯取闕

夏吳伐越

秋七月

冬仲孫何忌會晉韓不信齊高張宋仲幾衛大叔

申鄭國參曹人莒人邾人薛人杞人小邾人城成

周

天子微諸侯不享覲天子之在者惟祭與號故

諸侯之大夫相帥以城之此變之正也

大公作世
左無邾人
字

十有二月己未公薨于乾侯。皇明天啓元年春正月烏程閔齊伋遇五爻裁注

春秋穀梁傳

定公

元年春王

不言正月定無正也定之無正何也昭公之終非正終也定之始非正始也昭無正終故定無正始不言卽位喪在外也三月晉人執宋仲幾于京師此其大夫其曰人何也微之也何爲微之不正其執人於尊者之所也不與大夫之伯討也

夏六月癸亥公之喪至自乾侯戊辰公即位

殯然後即位也定無正現見無以正也踰年不言

即位是有故公也言即位是無故公也即位授

受之道也先君無正終則後君無正始也先君

有正終則後君有正始也戊辰公即位謹之也

定之即位不可不察也公即位何以日也戊辰

之日然後即位也癸亥公之喪至自乾侯何為

戊辰之日然後即位也正君乎國然後即位也

沈子曰正棺乎兩楹之間然後即位也內之大

事日即位君之大事也其不日何也以年決者

不以日決也此則其日何也著之也何著焉踰

年即位厲也於厲之中又有義焉未殯雖有天

子之命猶不敢況臨諸臣乎周人有喪魯人有

喪周人弔魯人不弔周人曰固吾臣也使人可

也魯人曰吾君也親之者也使大夫則不可也

故周人弔魯人不弔以其下成康為未久也君

至尊也去父母之殯而往弔猶不敢況未殯而

臨諸臣乎有故公謂昭公在外故也先君見授後君乃受須棺在殯乃言即位授受

之道也。正君乎國然後即位者。諸侯五日而殯。今以君始死之禮治之。故須殯而後言即位也。著之。欲有所見也。厲危也。公喪在外。踰年六月。乃得即位。危。故日之。又有義焉。謂先君未殯。則後君不得即位也。命召也。不敢。不敢背殯而往也。下成康爲未久。謂周道尚明。無愧於不往也。

秋七月癸巳葬我君昭公。

九月大雩。

雩月雩之正也。秋大雩非正也。冬大雩非正也。秋大雩雩之爲非正何也。毛澤未盡。人力未竭。未可以雩也。雩月雩之正也。月之爲雩之正何也。其時窮。人力盡。然後雩。雩之正也。何謂其時

窮。人力盡。是月不雨。則無及矣。是年不艾。則無

食矣。是謂其時窮。人力盡也。雩之必待其時窮。

人力盡何也。雩者爲旱求者也。求者請也。古之

人重請。何重乎請。人之所以爲人者讓也。請道

去讓也。則是舍其所以爲人也是以重之焉。請

哉。請乎應土公。古之神人有應土公者。通乎陰

陽。君親帥諸大夫道之。而以請焉。夫請者非可

詒託而往也。必親之者也是以重之。凡地所生

澤未盡。言秋百穀之潤澤未盡也。道之爲君必

百姓何謗。不敢煩民請命。願撫萬民。以
身塞無狀。此即請辭也。詒託猶假借

立煬宮

立者不宜立者也。煬公伯禽子。廟毀已久。

冬十月隕霜殺菽。

未可以殺而殺。舉重可殺而不殺。舉輕其曰菽

舉重也。解見僖三十三年

二年春王正月。

夏五月壬辰雉門及兩觀災。

其不曰雉門災及兩觀何也。災自兩觀始也不

以尊者親災也。先言雉門尊尊也。

雉門公宮之南門。故云尊。

兩觀闕也。欲言兩觀災及雉門。則卑不可以及尊。災不從雉門起。故不得言雉門災及兩觀。兩觀始災。故災在兩觀下也。

秋楚人伐吳。

冬十月新作雉門及兩觀。

言新有舊也。作為也。有加其度也。此不正其以

尊者親之何也。雖不正也。於美猶可也。

不正謂更廣大

之。不合法度也。據當諱。而以雉門親新作之下。故問之。於美猶可者。謂上災惡。故尊雉門。推災而遠之。今新作美好之事。雖不正。可以親之也。

六月葬陳惠公。

許遷于容城。

秋七月公至自會。

劉卷卒。

蒙音縣又音環

此不卒而卒者賢之也。寰內諸侯也。非列土諸侯。此何以卒也。天王崩為諸侯主也。

地者謂之寰內諸侯

天子畿內大夫有采

葬杞悼公。

楚人圍蔡。

圍公作圍

晉士鞅衛孔圉帥師伐鮮虞。

葬劉文公。

伯左作柏 奉公作莒

冬十有一月庚午蔡侯以吳子及楚人戰于伯舉。

楚師敗績。

吳其稱子何也。以蔡侯之以之舉其貴者也。蔡侯之以之則其舉貴者何也。吳信中國而攘夷。狄吳進矣。其信中國而攘夷。狄奈何。子胥父誅于楚也。挾弓持矢而干闔廬。闔廬曰大之甚。勇之甚。為是欲興師而伐楚。子胥諫曰臣聞之君。

郢以并反
又以正反

不爲匹夫興師且事君猶事父也。虧君之義，復父之讐，臣弗爲也。於是止。蔡昭公朝於楚，有美裘，正是日，囊瓦求之。昭公不與，爲是拘昭公於南郢。數年然後得歸。歸乃用事乎漢。曰：苟諸侯有欲伐楚者，寡人請爲前列焉。楚人聞之而怒，爲是興師而伐蔡。蔡請救于吳。子胥曰：蔡非有罪，楚無道也。君若有憂中國之心，則若此時可矣。爲是興師而伐楚，何以不言救也？救大也。謂貴子也。見不以禮曰干。正是日。謂昭公始朝楚之日也。用事者，禱漢水神也。何以不言救，據實救。

蔡也。救大也者，未同諸夏。故不與救也。

楚囊瓦出奔鄭。

楚左作郢

庚辰，吳入楚。

日入，易無楚也。易無楚者，壞宗廟，徙陳器，撻平王之墓，何以不言滅也。欲存楚也。其欲存楚，奈何？昭王之軍敗而逃，父老送之，曰：寡人不肖，亡先君之邑，父老反矣。何憂無君？寡人且用此入海矣。父老曰：有君如此，其賢也。以衆不如吳，以必死不如楚，相與擊之。一夜而三敗，吳人復立。

何以謂之吳也。狄之也。何謂狄之也。君居其君之寢而妻其君之妻。大夫居其大夫之寢而妻其大夫之妻。蓋有欲妻楚王之母者。不正乘敗人之績而深為利。居人之國。故反其狄道也。

三公作正

五年春王三月辛亥朔日有食之。

夏歸粟于蔡。

諸侯無粟。諸侯相歸粟。正也。孰歸之。諸侯也不言歸之者。專辭也。義邇也。

專辭謂不言歸之者主名。若獨是魯也。義

邇言此是邇近之事。不足具列諸侯矣。

於越入吳。

六月丙申季孫如意卒。

秋七月壬子叔孫不敢卒。

冬晉士鞅帥師圍鮮虞。

六年春王正月癸亥鄭游速帥師滅許以許男斯

歸。

二月公侵鄭公至自侵鄭。

夏季孫斯仲孫何忌如晉。

秋晉人執宋行人樂祁犁。

速公作遊

冬城中城

城中城者三家張也或曰非外民也

中城內城張侈也

季孫斯仲孫忌帥師圍鄆

七年春王正月

夏四月

秋齊侯鄭伯盟于鹹

齊人執衛行人北宮結以侵衛

以重辭也衛人重北宮結

衛重結故執以侵之若楚執宋公以伐宋

齊侯衛侯盟于沙

公作沙澤

大雩

齊國夏帥師伐我西鄙

九月大雩

冬十月

八年春王正月公侵齊公至自侵齊二月公侵齊

三月公至自侵齊

公如往時致月危致也往月致時危往也往月

致月惡之也

曹伯露卒

春秋左傳卷之九

定公

九

夏齊國復帥師伐我西部

公會晉師于瓦公至自瓦

秋七月戊辰陳侯柳卒

晉士鞅帥師侵鄭遂侵衛

葬曹靖公

九月葬陳懷公

季孫斯仲孫何忌帥師侵衛

冬衛侯鄭伯盟于曲濮

從祀先公

士公作趙

貴復正也文公逆祀

盜竊寶玉大弓

寶玉者封圭也大弓者武王之戎弓也周公受

賜藏之魯非其所以與人而與人謂之亡非其

所取而取之謂之盜封圭始封之圭戎弓武王征伐之弓也

九年春王正月

魯公作曠夏四月戊申鄭伯蠆卒

得寶玉大弓

其不地何也寶玉大弓在家則羞不目羞也惡

得之得之堤下。或曰陽虎以解衆也。國之大寶。在家則蓋。

況陪臣專之乎。恥甚而不目其地也。

六月葬鄭獻公。

秋齊侯衛侯次于五氏。

秦伯卒。

冬葬秦哀公。

十年春王三月及齊平。

頰左作夾夏公會齊侯于頰谷。公至自頰谷。

離會不致。何為致也。危之也。危之則以地致何

也。為危之也。其危奈何。曰頰谷之會。孔子相焉。

兩君就壇。兩相相揖。齊人鼓譟而起。欲以執魯

君。孔子歷階而上。不盡一等。而視歸乎齊侯。曰

兩君合好。夷狄之民。何為來為。命司馬止之。齊

侯逡巡而謝。曰寡人之過也。退而屬祝其二三

夫曰夫人率其君與之行。古人之道。二三子獨

率我而入夷狄之俗。何為罷會。齊人使優施舞

於魯君之幕下。莫孔子曰笑君者罪當死。使司馬

行法焉。首足異門而出。齊人來歸鄆。謹龜陰之

田者蓋為此也。因是以見雖有文事，必有武備。

孔子於頰谷之會見之矣。二國會曰離。各是其所是，非其所非，是非

不同。故曰離。離則善惡無在，不足致之宗廟。故不致也。屬語也。優，併施其名也。齊侯自頰谷歸，謂晏子曰：寡人獲罪於魯侯，如之何？晏子曰：君子謝過以質，小人謝過以文。齊嘗侵魯四邑，請皆還之。

晉趙鞅帥師圍衛。之九月，齊人來歸鄆、讙、龜陰之田。一善而甄，禮乎齊，齊曰

齊人來歸鄆讙龜陰之田。一善而甄，禮乎齊，齊曰

叔孫州仇、仲孫何忌帥師圍郕。郕而攻，魯以將

秋，叔孫州仇、仲孫何忌帥師圍郕。之會，非也。

宋樂大心出奔曹，宋公子地出奔陳。

冬，齊侯、衛侯、鄭游速會于安甫。

叔孫州仇如齊。

宋公之弟辰暨宋仲佗、石彊出奔陳。

十有一年，春，宋公之弟辰及仲佗、石彊公子地自

陳入于蕭以叛。

宋公之弟辰未失其弟也。及仲佗、石彊公子地

以尊及卑也。自陳，陳有奉焉。爾入于蕭以叛，入

者，內弗受也。以者，不以也。叛，直叛也。

辰未有失其為弟之

春秋左傳卷之... 定公 十二

道。故書弟以罪宋公。不能制御強臣以撫其弟。而使二卿脅以外奔。故著暨以表強辭。稱弟以見無罪也。今而入國。兩子之情。非辰之意。故重發例以明無罪。蕭宋邑。

夏四月。

秋樂大心自曹入于蕭。

冬及鄭平叔還如鄭莅盟。

十有二年春薛伯定卒。

夏葬薛襄公。

叔孫州仇帥師墮郈。

墮猶取也。墮非訓取以陪臣專強恃城為固叔孫毀其城若新得之故云猶取也

衛公孟彊帥師伐曹。

季孫斯仲孫何忌帥師墮費。

秋大雩。

齊公作晉冬十月癸亥公會齊侯盟于黃。

十有一月丙寅朔日有食之。

公至自黃。

十有二月公圍成。

非國言圍圍成大公也。以公之重而伐小邑取甚故大之使若國然

公至自圍成。

二傳齊侯
下有衛侯
二字葭公
作瑕

何以致危之也何危爾邊乎齊也

十有三年春齊侯次于垂葭加

夏築蛇淵囿

大蒐于比蒲

衛公孟彊帥師伐曹

秋晉趙鞅入于晉陽以叛

以者不以者也叛直叛也

冬晉荀寅士吉射入于朝歌以叛

晉趙鞅歸于晉

公羊寅下有及字

此叛也其以歸言之何也貴其以地反也貴其

以地反則是大利也非大利也許悔過也許悔

過則何以言叛也以地正國也以地正國則何

以言叛其入無君命也叛以歸言據叛惡而歸善也

也。以地正國以晉陽之兵還正國也。專入晉陽以與兵甲。不得以言叛。實以驅惡而安君則釋

兵。不得以言歸。春秋善惡必著之義

薛弒其君比

十有四年春衛公叔戌來奔

晉趙陽出奔宋

晉左作衛

春秋左傳卷之十四 定公

公作陳公子

二月辛巳。楚公子結、陳公孫佗、人帥師滅頓。以頓

子詳歸

子詳歸。

夏，衛北宮結來奔。

檇公作醉

五月，於越敗吳于檇李。

吳子光卒。

牽公作堅

公會齊侯、衛侯于牽。公至自會。

秋，齊侯、宋公會于洮。

天王使石尚來歸脤。

脤本又作頰

脤者何也。俎實也。祭肉也。生日脤。熟曰臠。其辭

石尚士也。何以知其士也。天子之大夫不名。石

尚欲書春秋。諫曰：久矣周之不行禮於魯也。請

行脤，貴復正也。

辭猶書也。欲書春秋。欲著名於春秋也。

衛世子蒯聵出奔宋。衛公孟彊出奔鄭。

宋公之弟辰自蕭來奔。

大蒐于比蒲。邾子來會公。

城莒父及霄。

十有五年，春，王正月，邾子來朝。

麋鼠食郊牛，牛死，改卜牛。

不敬莫大焉。公不敬最大。故天災最甚。

二月辛丑楚子滅胡以胡子豹歸。

夏五月辛亥郊。

壬申公薨于高寢。

高寢非正也。

鄭罕達帥師伐宋。

渠公作遠

齊侯衛侯次于渠蔭。

邾子來奔喪。

喪急故以奔言之。

傳言急所以申匍匐之情

弋二傳作
如下同

秋七月壬申弋氏卒。

妾辭也哀公之母也。

八月庚辰朔日有食之。

九月滕子來會葬。

丁巳葬我君定公雨不克葬。

葬既有日不為雨止禮也雨不克葬喪不以制

也。

稷二傳作
與

戊午日下稷乃克葬。

乃急辭也不足乎日之辭也。

稷。曷也。下曷。謂補時。詳官八年注。

辛巳葬定弋

冬城漆

皇明天啓元年春正月烏程閔齊伋遇五父裁注

春秋穀梁傳

哀公

元年春王正月公即位

楚子陳侯隨侯許男圍蔡

麇鼠食郊牛角改卜牛夏四月辛巳郊

二傳無角字

此該之變而道之也於變之中又有言焉麇鼠食郊牛角改卜牛志不敬也郊牛日展解角而知傷展道盡矣郊自正月至于三月郊之時也夏四月郊不時也五月郊不時也夏之始可以

承春以秋之末承春之始蓋不可矣九月用郊用者不宜用者也郊三卜禮也四卜非禮也五卜強也卜免牲者吉則免之不吉則否牛傷不言傷之者傷自牛作也故其辭緩全曰牲傷曰牛未牲曰牛其牛一也其所以為牛者異有變而不郊故卜免牛也巳牛矣其尚卜免之何也禮與其亡也寧有嘗置之上帝矣故卜而後免之不敢專也卜之不吉則如之何不免安置之繫而待六月上甲始庀牲然後左右之子之所

言者牲之變也而曰我一該郊之變而道之何也我以六月上甲始庀牲十月上甲始繫牲十一月十二月牲雖有變不道也待正月然後言牲之變此乃所以該郊郊享道也貴其時大其禮其養牲雖小不備可也子不志三月卜郊何也郊自正月至于三月郊之時也我以十二月下辛卜正月上辛如不從則以正月下辛卜二月上辛如不從則以二月下辛卜三月上辛如不從則不郊矣

該備也。春秋書郊終於此。故於此備說郊之變。變謂郊非其時。

或牲被災害。展道盡矣者。謂展道雖盡。所以備災之道不盡。譏哀公不敬。故致天變也。九月用郊。在成十七年。三卜者。下文十二月正月二月三卜是也。求卜之道三。故曰禮。強也者。知其不可而強為之也。其辭緩。謂宣三年郊牛之口傷。加之。緩辭。庀具也。待具後牲。然後左右前牛。皆我用之。不復須卜。已有新牲故也。子之所言。弟子問穀梁子之辭。而曰我者。是弟子述穀梁子自我之意。我以六月穀梁子答弟子之辭。十二月以前。牲有變。則改卜牛。以不妨郊事。故不言其變。至正月以後。然後言其變。重其妨郊也。此所以該郊者。言其變道盡矣。不志三月卜郊。常事不書也。此三月。謂十二月正月二月。郊必用上辛者。取其新潔莫先也。

秋齊侯衛侯伐晉

冬仲孫何忌帥師伐邾

邾火號反
又音郭

二年春王二月季孫斯叔孫州仇仲孫何忌帥師

伐邾取瀛東田及沂西田

取瀛東田瀛東未盡也及沂西田沂西未盡也

瀛沂皆水名以其言東西則知其未盡

癸巳叔孫州仇仲孫何忌及邾子盟于句繹

三人伐而二人盟何也各盟其得也季孫不得田不與盟

夏四月丙子衛侯元卒

滕子來朝

晉趙鞅帥師納衛世子蒯瞶于戚

納者內弗受也。帥師而後納者，有伐也。何用弗受也？以輒不受也。以輒不受，父之命受之，王父也。信父而辭王父，則是不尊王父也。其弗受以尊王父也。

鐵公作栗

秋八月甲戌，晉趙鞅帥師，及鄭罕達帥師，戰于鐵。

鄭師敗績。

冬十月，葬衛靈公。

十有一月，蔡遷于州來，蔡殺其大夫公子駟。

三年春，齊國夏，衛石曼姑帥師圍戚。

此衛事也。其先國夏何也？子不圍父也。不繫戚

於衛者，子不有父也。

國夏首兵，應言衛戚。今不言。辟子有父也。子有父者，

戚繫衛，則為大夫屬於衛矣。

夏四月甲午，地震。

五月辛卯，桓宮僖宮災。

言及則祖有尊卑，由我言之則一也。

遠祖親盡，尊卑如一。

啓公作開

季孫斯、叔孫州仇帥師，城啓陽。

宋樂髡帥師伐曹。

秋七月丙子，季孫斯卒。

春秋穀梁傳

哀公

蔡人放其大夫公孫獵于吳。

冬十月癸卯秦伯卒。

叔孫州仇仲孫何忌帥師圍邾。

四年春王二月庚戌盜弑蔡侯申。

稱盜以弑君不以上下道道也。內其君而外弑

者不以弑道道也。春秋有三盜。微殺大夫謂之

盜。非所取而取之謂之盜。辟中國之正道以襲

利謂之盜。以上下道道者。若隱四年衛州吁弑

序矣。內其君而外弑者。若襄七年鄭伯髡原如

會。未見諸侯。丙戌卒於操。是不以弑道道也。微

殺大夫。十三年冬盜殺陳夏區夫是也。非所取

而取。陽貨竊寶玉大弓是也。辟中國之正道以

襲利。此殺蔡侯申是也。是非微者。蓋抑而書盜也。

蔡公孫辰出奔吳。

葬秦惠公。

宋人執小邾子。

夏蔡殺其大夫公孫姓公孫霍。

晉人執戎蠻子赤歸于楚。

城西郭。六月辛丑亳社災。

二公作三
弑左作殺

變公作曼

亮公作蒲

亳社者。亳之社也。亳亡國也。亡國之社。以為廟

屏戒也。其屋亡國之社。不得達上也。武王伐紂。於諸侯。諸侯立亳社於廟外。以為屏蔽。致戒心也。為之作屋。不使上通天也。有屋。故言災。

秋八月甲寅。滕子結卒。

冬十有二月。葬蔡昭公。

葬滕頃公。

毗公作比

五年春。城毗。

夏。齊侯伐宋。

晉趙鞅帥師伐衛。

杵公作處

秋九月癸酉。齊侯杵臼卒。

冬。叔還如齊。

閏月。葬齊景公。

不正其閏也。

閏月。附月之餘日。喪事不數。

瑕公作葭

六年春。城邾瑕。

晉趙鞅帥師伐鮮虞。

吳伐陳。

夏。齊國夏及高張來奔。

叔還會吳于柤。

注加

荼音舒又音徒一音犬加反公作舍

秋七月庚寅楚子軫卒

齊陽生入于齊齊陳乞弑其君荼

陽生入而弑其君以陳乞主之何也不以陽生

君荼也其不以陽生君荼何也陽生正荼不正

不正則其曰君何也荼雖不正已受命矣入者

內弗受也荼不正何用弗受以其受命可以言

弗受也陽生其以國氏何也取國於荼也受命受命

於景公而立也以國氏謂去公子陽生篡國故不言公子也

冬仲孫何忌帥師伐邾

宋向巢帥師伐曹

七年春宋皇瑗于卷帥師侵鄭

晉魏萬曼多帥師侵衛

夏公會吳于在陵緡

秋公伐邾八月巳酉入邾以邾子益來

以者不以者也益之名惡也春秋有臨天下之

言焉有臨一國之言焉有臨一家之言焉其言

來者有外魯之辭焉惡也者惡其不能死社稷臨者撫有之也王者無外

以天下為家盡其有也諸侯之臨國亦得有之如王於天下大夫臨家猶諸侯臨國此三者皆

以外內辭別之。王者以海內之辭言。卽僖二十八年。天王狩于河陽。傳曰。全天王之行也。是也。王者微弱。則以外辭言之。卽僖二十四年。天王出居于鄭。傳曰。失天下也。是也。諸侯臨國。亦據外內言之。若宣九年。辛酉。晉侯卒于扈。傳曰。其地于外也。其日未踰竟也。旣以內外顯地。及日。是以一國言之。家謂采地。若文元年。毛伯來錫公命。定四年。劉卷卒。其毛劉皆采邑名。大夫氏采爲家。是以一家言之也。非已內有從外來者。曰來。今魯侯身以歸而曰來。是外之矣。

宋人圍曹

冬鄭駟弘帥師救曹

八年春王正月宋公入曹以曹伯陽歸

吳伐我

閹公作僇 夏齊人取讎及闡

惡內也

內不言取。言取。授之也。前年以邾子益來。益齊之甥也。畏齊。故賂之。

歸邾子益于邾

益之名失國也

於王法當絕故

秋七月

冬十有二月癸亥杞伯過卒

齊人歸讎及闡

九年春王二月葬杞僖公

宋皇瑗帥師取鄭師于雍丘

春秋左傳卷之八

哀公

取易辭也。以師而易取。鄭病矣。

鄭師將劣。由君不任其才。

夏。楚人伐陳。

秋。宋公伐鄭。

冬。十月。

十年。春。王二月。邾子益來奔。

公會吳伐齊。

三月。戊戌。齊侯陽生卒。

夏。宋人伐鄭。

晉趙鞅帥師侵齊。

五月。公至。自伐齊。

葬齊悼公。

衛公孟彊。自齊歸于衛。

薛伯夷卒。

秋。葬薛惠公。

冬。楚公子結帥師伐陳。吳救陳。

十有一年。春。齊國書帥師伐我。

轅公作袁

夏。陳轅頗^{破何}出奔鄭。

五月。公會吳伐齊。甲戌。齊國書帥師及吳戰于艾。

陵齊師敗績獲齊國書

秋七月辛酉滕子虞母卒

冬十有一月葬滕隱公

衛世叔齊出奔宋

十有二年春用田賦

古者公田什一用田賦非正也

古者一丘之田方十六井一百

四十四夫軍賦之法因其田財通出馬一匹牛三頭今乃分別其田及家財各令出此賦則一丘之田出馬二匹牛六頭故曰用田賦言非所宜用也謂之田賦者古者但賦其家財今又計田貢故曰田賦也

夏五月甲辰孟子卒

孟子者何也昭公夫人也其不言夫人何也諱

取同姓也

公會吳于橐臯

秋公會衛侯宋皇瑗于鄆

宋向巢帥師伐鄭

冬十有二月螽

十有三年春鄭罕達帥師取宋師于岳

取易辭也以師而易取宋病矣

鄭公作運

成二傳作
戊

夏許男成卒

公會晉侯及吳子于黃池

黃池之會吳子進乎哉遂子矣吳夷狄之國也

祝髮文身欲因魯之禮因晉之權而請冠端而

襲其籍于成周以尊天王吳進矣吳東方之大

國也累累致小國以會諸侯以合乎中國吳熊

為之則不臣乎吳進矣王尊稱也子卑稱也辭

尊稱而居卑稱以會乎諸侯以尊天王吳王夫

差曰好冠來孔子曰大矣哉夫差未能言冠而

欲冠也

遂子進遂稱子也請冠端而襲請著玄冠玄端衣冠上下為相襲也籍謂貢獻

著於籍錄以為常職也累累猶數數也則不臣乎言其臣也未能言冠不知冠有差等也

楚公子申帥師伐陳

於越入吳

秋公至自晉

晉魏曼多帥師侵衛

葬許元公

九月螽

冬十有一月有星孛于東方

公無曼字

區公作疆

盜殺陳夏區夫。

十有二月螽。

十有四年春西狩獲麟。

引取之也。狩地不地不狩也。非狩而曰狩大獲

麟故大其適也。其不言來不外麟於中國也。其

不言有不使麟不恒於中國也。

鸛鶴非常禽。蜚或蜚非嘉瑞。故書。

有言來。中國軌儀表於遐荒。道風扇於不朽。麒麟步郊。不為暫有。鸞鳳栖林。非為權來矣。

皇明天啓元年春正月烏程閔齊伋遇五父裁注

